

四庫全書

史部

欽定四庫全書

史部

福建通志卷六十九

詳校官監察御史

臣陳化龍

檢討

臣德生覆勘

總校官檢討

臣

何思鈞

校對官中書

臣

汪墉

謄錄監生

臣

王寶慶

欽定四庫全書

福建通志卷六十九

藝文

二

表疏

唐陳元光請建州縣表

泉潮有咸左王鈐衛翊府左郎將臣陳元光言伏承
永享二年八月二日制臣進階正議大夫嶺南行軍
總管者受命戰兢抵官彌懼臣以冲幼出自書生迨
及童年濫膺首選未及干戈守至懦至柔之質惟知
飽煖無田區區曰處之能幸賴先臣緒業叨蒙今日國
恩寄深都閭任事專征爰從視職以來不敢少有寧

處況茲鎮地極七閩境連百粵左衽居椎髻之半可耕乃火田之餘原始要終流移本出于二州窮凶極暴積弊遂踰于十稔元惡既誅餘兇復起法隨出而奸隨生功愈勞而效愈寡撫綏未易子育誠難竊惟兵革徒威於外禮讓乃格其心揆諸陋俗良由職方久廢學校不興所事者蒐狩為生所習者暴橫為尚誅之則不可勝誅徙之則難以屢徙倘欲生全幾致刑措其本則在創州縣其要只在興庠序蓋倫理謹則風俗自爾漸孚治法彰則民心自知感激切以臣鎮地曰安仁誠為治教之邦江臨漳水實乃建名之本如蒙乞勅定名號而復入職方建治所而注頒官吏治循往古之良規誠為救時之急務秦越百家愈無罅隙畿荒一德更有何殊臣謬居外鎮忝在封疆所得事宜合奏謹具厥由伏候勅旨

宋陳洪進納地表

臣聞峻極者山也在汙壤而不辭無私者日也雖覆
盆而必照顧惟遐僻尚隔聲名願歸益地之圖輒露
由衷之請臣所領兩郡僻在一隅自浙右未歸金陵
偏霸臣以崎嶇千里之地疲散萬餘之兵望雲就日
以雖勤畏首畏尾之不暇遂從間道遠貢赤誠願傾
事大之心庶齒附庸之末太祖皇帝賜之軍額授以
節旄俾專達于一方復延賞于三世祖父荷漏泉之
澤子弟享列土之榮榮戟在門龜綢盈室雖冠列藩
之寵未脩肆覲之儀暨江表底平先皇厭世會嬰犬
馬之病尚阻雲龍之底皇帝陛下欽嗣丕基誕膺景
命臣遠辭海嶠入覲天墀獲親咫尺之顏疊被便蕃
之澤六飛遊幸每奉屬車之塵三殿宴嬉屢挹大樽
之味旬浹之內雨露駢臻至于童愚亦荷殊獎恩榮
若此報效何階志益繼于君軒心遂忘於坎井臣不
勝大願願以所管漳泉兩郡獻于有司使區區負海
之邦遂為內地蚩蚩生齒之類得見太平伏望聖慈

授臣近地別鎮臣男文顯等早膺朝獎皆忝郡
符牙校賓僚久經驅策各希鈞造稍需鴻私

歐陽修薦教授陳烈充太學博士劄子

伏見國家崇建學校近年以來太學生徒常至三四
百人此朝廷盛美事數百年未嘗有也然而教導之
方必慎其選其進德脩業必有篤行君子可以不言
而化者使居其間以為學者師法庶幾內修其實不
止徒聚之多為虛名之美也伏見福州處士陳烈清
節茂行著自少時晚而益勤久而愈信非惟一方學
者之所師蓋天下之士皆推尊其道德謂宜以禮致
之朝廷必有裨補近聞命以官秩使教學于鄉里其
禮甚薄未足以稱勵賢旌德之舉臣今乞命以博士
之職召致太學雖未能盡其才亦足以副天下學者
之望而誦朝廷崇賢
勸學之實今取進止

陳襄薦直講陳烈不次任用劄子

伏見前授安州司務參軍充國子監直講陳烈心仁氣剛才智卓越學聖人之言而必踐其實稽先王之法而必適於時博通羣經尤明于典禮之與其為文章淵源浩博肆筆而成求之今日鮮有比者慶厯初嘗與鄉試于禮部罷歸鄉里無復仕進安貧力學積四十年著書數萬言未見其上仁宗朝常因近臣論薦及本州監司長吏高其風節數以名聞累降召命以學官起之辭而不至世以為潔身獨行之士是非知烈者也烈之所學皆孔孟之學觀其事業足以有為自以身載聖賢之道不為苟進可以禮致而不可以利屈如斯而已矣伏思陛下臨御以來博延髦俊得人之盛跨越百王如烈之賢不為難致望陛下特以禮命召致闕廷賜對清問使陳二帝三王之治六經四書之要與夫當世之務必有以上稱陛下尊賢

重德之舉今保舉堪充清要不次任用後不如所舉臣甘受面欺之罪謹具奏聞伏候勅旨

蔡襄奏蠲丁錢疏

臣伏見泉州漳州興化軍人戶每年輸納身丁米七斗五升年二十至六十免故臣體問得偽命日前諸州各有丁錢惟漳泉等州折變作米至陳洪進納疆土之後以官斗較量得七斗五升每年送納價錢伏緣南方地狹人貧終身傭作僅能了得身丁其間不能輸納者父子流移逃避他所又有甚者往往生子不舉人情至此可為嗟嘆伏惟祖宗恢復天下大去無名之斂然諸州身丁尚有輸納真宗皇帝哀憐百姓困窮之弊祥符中特降御札除兩浙福建等六路身丁錢四十五萬貫其時漳泉興化亦是丁錢折變作米無人論奏因仍科納遂致先朝大惠不及三郡三郡之人引領北望迄今又四十年矣臣聞聖人以

生為德以孝為本今陛下之民不肯養子不亦累于
生生之德乎先朝所行之事有所未及陛下推而行
之可謂至孝矣伏望陛下進成先帝之仁下恤遠民
之苦蠲放三州軍丁錢口令依建州例歲納口錢于
生民性命全
活豈少也

蔡襄請增置諫官疏

臣伏見朝廷選用王素余靖歐陽修等增備諫官是
三人者皆特立之士昔以直言觸忤權臣擯斥且久
今者一日並命人無賢愚萬口相慶皆謂陛下特發
神斷擢任不疑蓋陛下深憂政教未舉賞罰未明羣
臣之邪正未分四方之利害未究故增耳目之官以
廣言路此陛下為社稷生靈大計也臣竊思任諫非
難惟聽諫之難聽諫非難惟用諫之難如素靖修等
忠誠剛氣著信于人况蒙陛下獎拔之知必能箴闕

政獻明謨摘回邪擊權倖思所以報効也然邪人惡之必有禦之之說不過曰某人也好名也好進也彰君過也或進此說正是邪人欲蔽天聰不可不察臣請為陛下陳之一曰好名夫忠臣務盡其心事有必須切直者則極論之豈顧名哉若避好名之毀而無所陳施則土木其人皆可備數何煩陛下選揀如此之至况名者聖人以之勵世俗分善惡豈可廢乎借使為善近名陛下試思今之人遠權利敦潔行以近名者亦有幾人哉二曰好進前古諫臣之難者庸主昏世上犯嚴威旁觸勢要鼎鑊居側斧鑕在前死所不辭安得好進乎蓋近來諫官進用太速故世人咸以謂之好進今諫官有盡忠補闕之効陛下但久任勿遷使其人果忠且義雖死于是官亦無恨矣三曰彰君過凡諫諍之臣蓋以司乎過舉也緩則密疏急則昌言期于必正若人主從而行之適以彰乎納諫之美安得謂之彰過乎然諫官亦有好名好進彰君

過者異於此巧者之為諫臣事之難言者則暗而不
言擇其無所忤者言之就令不行復再議退而曰某
事我嘗言之矣此可謂之好名也容容默默無所耻
愧踐歷資序以登貴仕此可謂之好進也凡人主之
有過諫官最為近密或不盡言人主何從而知且變
更乎傳之當世垂之于後終以為過此可謂彰君過
臣向之所論乃忠與巧者之分願賜省覽今陛下出
於聖慮自擢官必自主之若有陳述于理適當即賜
施行無使天下之人謂朝廷有好諫之名而無好諫
之實使其言有訐切亦願優假無為姦邪構間致有
斥逐使天下之人指朝廷有拒諫之失也臣迹遠
言近不任兢惶激切之至臣某昧死再拜謹上

蘇頌考課縣令疏

臣竊以國家恃以治者民也使民敦本而趨善者縣
令也是以前世論政者莫不以此為首務邇者仁宗

皇帝深知其故始詔保任縣令歲復增考課之法其所以責任求治之意至矣然而縣邑之間卓然以治理之效聞者猶寡臣竊思之蓋以殿最之格不過校簿書案文法而已故簿書益密而編戶益擾文法彌具而治效彌遠是豈朝廷任官責效之本意邪且古之治民勸導教率無所不至故孝悌力田有優異之科三老廉吏有表率之義由是農民衆而田土闢風俗厚而獄訟稀今則不然民勤於力苟致贍足則懼升遷等第遂有因循不耕之患是力田者有累而情游者無罰也父兄聚居丁產稍多則懼差徭配率遂有離析異居之弊是孝悌無所勸而姦惡未得止也鄉村但有耆壯巡察吏卒追捕不閒以善道諭之者是教化無由至而訟獄不得息也然則欲變其俗使稍敦本者亦在朝廷勸勉之而已臣欲望明詔戒勅自今考課以令長能用善道諭民拋末游而歸本業致獄訟稀簡而盜賊衰息者為優等其能勾校簿書

均稽稅賦發姦捕盜興利除害者為次等二者咸無
為下等優等望賜超擢次等再加激勵末等自當降
黜其田里之民亦許令長舉察州郡案覆立為科條
有能盡力田畝開墾陂澤久遠為利于衆者或羣居
孝友宗族敦睦為鄉黨所推者如此之類特與蠲除
戶下差役其復有明於義理年高行著者即少加旌
異或立鄉官之號以賜之使人諭教化於下相率而
歸于善道如此則廉平之吏思盡所長禮義之風庶
幾可致矣

鄭俠論新法進流民圖疏

臣伏見去年大蝗秋冬亢旱以至於今經春不雨麥
苗枯焦黍粟麻豆粒不及種旬日以來街市米價暴
貴羣情憂惶十九懼死方春斬伐竭澤而漁大營官
錢小求升米草木魚鼈亦莫生遂皆中外諸臣輔相

陛下不以道以至于此臣竊惟災患有可召之道無可試之形其致之有漸而來如疾風暴雨不可復禦流血藉屍方知喪敗此庸人之見而古今比比有之所貴於聖神者為其能圖患未然轉禍為福者耳方今之勢猶有可救臣願陛下開倉廩賑貧乏諸有司斂掠不道之政一切罷去庶幾早召和氣上應天心調陰陽降雨露以延天下萬姓垂死之命而固宗社萬萬年無疆之祚夫君臣際遇貴乎知心以臣之愚深知陛下愛養黎庶甚于赤子故自即位以來一有利民便物之政靡不毅然主張而行陛下之心亦欲人人壽富而躋之堯舜三代之盛耳夫豈區區充滿府庫盈溢廩倉終以富行強大勝中外哉而中外之臣畧不推明陛下此心而乃肆其刀鎗剗割生民侵肌及骨使之困苦而不聊生坐視夫民之死而不恤陛下所存如彼羣臣所為如此不知君臣際遇欲作何事徒只意指氣使而已乎臣又惟何世而無忠義

何代而無賢德亦在乎人君所以駕馭之何如耳古之人在山林猷畝不忘其君其芻蕘負販匹夫匹婦咸欲自盡以贊其上今陛下之朝臺諫默默其位而不敢言事至有規避百為不敢居是職者而左右輔弼之臣又皆貪鄙近利使夫抱道懷識之士皆不欲與之言不知時然耶陛下有以使之然耶以為時然則堯舜在位便有夔契湯文在上便有伊呂以至漢唐之明君我祖宗之聖朝皆有大忠義大賢德之臣布于中外君臣之義若腹心手足焉君倡于上臣和于下主發于內臣應于外而休嘉之德下浸于昆蟲草木千百世之下莫不欣慕而效則之獨陛下以仁聖當御撫養為心而羣臣所以應和之者如此夫非時然陛下所以駕馭之道未審爾陛下以爵祿駕馭天下忠賢而使之如此甚非宗廟社稷之福也夫得一飯于道旁則皇皇圖報而終身饜飽于其父則不知德此庸人之常情也今之食祿往往如此若臣所

聞則不然君臣之義父子之道也故食其祿則憂其事凡以移事父之孝而從事于此也乃若思慮不出其位尸祝不越樽俎治庖人之事牛羊茁壯會計當各以其職而不相侵也至于邦國若否知而不言豈有君憂國危羣臣乃飽食饜觀若視路人之事而不救曰吾各有守天下之事非我憂也故知朝廷設官位有高下臣子事主忠無兩心與其得罪于有司孰與不忠於君父與其苟容于當世孰與得罪於皇天臣所以不避萬死深冒千萬重之天閭以告訴于陛下者凡以上畏天中憂君國而下憂生民耳若臣之身使其粉碎如一螻蟻無足顧愛切聞南征北伐者皆以其勝捷之勢山川之形為圖而來獻料無一人以天下之民質妻賣兒流離道散斬桑伐棗壞廬舍而賣於城市輸官糴粟遑遑不給之狀為圖而獻前者臣不敢以所聞聞謹以安門上逐日所見繪成一圖百不及一但經聖明眼目已可嗟咨涕泣而况數

千里之外有甚于此者哉其圖謹附狀投進如陛下
觀圖行臣之言十日不雨乞即斬臣宣德門外以正
欺君謾天之罪如稍有所濟亦乞正臣越分言事之
刑甘俟誅戮干冒冕旒熙寧六年三月二十六日

鄭俠再上天災民流疏

熙寧六年十一月十一日奏狀為大臣誣罔至尊絕
不近理彼皆有所憑恃而後敢為如大臣對陛下皆
云天災民流百物失所兵革不息為天數者臣乞問
其人為學周公耶學孔子耶孟子耶周公作無逸歷
陳人君之享國三十四年或五六十一年皆由人君嚴
恭寅畏天命自度治民祇懼不敢康寧則有永不知
稼穡之艱難不問小人之勞生則逸則有短又曰惟
不欽厥德乃早墜厥命使周公相陛下而天旱民流
百物失所兵革不息如此周公曰天數乎孔子告哀
公曰存亡禍福皆已而已天災地殃不能加也使孔

子相陛下而天旱民流百物失所兵革不息如此孔子曰天數乎孟子曰殺人以刃與政有以異乎又曰王無罪歲使孟子相陛下而天旱民流百物失所兵革不息如此孟子曰天數乎然則羣臣所為學者皆非周公孔子孟子之為人而所以相陛下者皆非周公孔子孟子之存心則陛下獨力何以為天下臣所謂陛下獨力者謂無臣也所謂陛下無臣者非無羣臣也無大臣也所謂大臣者以道事君不可則止而已其高爵重祿則日歸于已清資美職則分授子弟中使相望于道路黃金並聚于私室而天旱民流百物失所兵革不息則曰天數此為大臣則屠沽僕隸誰不克為方今臺諫亦如芻靈木偶之類皆所畫一伏願陛下登宣德門召文武百官京城之民以臣狀示衆如衆說以臣之言是則望陛下稍稍懲戢左右近臣使無得公然肆誕以戕害萬姓危玷社稷如衆以臣言為非即乞斬臣于衆人之前以塞京師流言

洵洵之路
臣謹奏

陳瓘論蔡京疏

臣聞盡言招禍古人所戒言路之臣豈能免此臣伏見翰林學士承旨蔡京當紹聖之初與其弟卞俱在朝廷贊導章惇共作威福卞則陰為謀畫惇則果斷力行且謀且行者京也哲宗急於繼述專於委任事無大小信惇而不疑卞於此時假繼述之說以美私史惇於此時因委任之篤自明已功京則咸推安石之聖過於神考以合其弟又推定策之功毀滅宣仁以合章惇惇之矜伐京為有助卞之乖悖京實贊之當此之時言官常安民屢攻其罪京與惇卞共怒安民協力排陷斥為奸黨而孫諤董敦逸陳次升亦因論京相繼黜逐又哲宗晚得鄒浩不由進擬置之言路浩能忘身殉節上副聖知京又因其得罪從而擠

毀是以七年之間五逐言者掩朝廷之耳目成私門之勢利言路既絕人皆鉗默凡所施行得以自恣遂使當時之所行皆為今日之所蔽臣請畧指四事皆天下所以議京者也蔡卞之薄神考陛下既知其罪矣伯仲相符墳蕘如一事無異議罪豈殊科一點一留人所未諭此天下之所以議京者一也邢恕之累宣仁陛下既明其罪矣於是司馬光劉摯梁燾等皆蒙叙復京嘗奏疏請誅摯等家族雷如京言則所以累宣仁者豈特邢恕一人而已哉在恕則逐之在京則留之何以塞邢恕不平之口而慰宣仁在天之靈乎此天下之所以議京者二也章惇自明定策之功追貶王珪京亦自謂元豐未被命帶開封府僧子攜劍入內欲斬王珪京之門人皆謂京於此時禁制宣仁京亦有社稷之功今陛下雪珪之罪還其舊官是以珪之貶惇為非也在惇則非之在京則留之如是則惇有辭矣珪有憾矣此天下之所以議京者三也

章惇之初薦信京卞傾心竭意隨此二人假繼述之說以行其私三人議論如出一口自紹聖三年九月卞為執政於是京有觖望而與惇睽矣四年三月林布為執政於是京始大怒而與惇絕矣自今觀之京之所以與惇睽絕者為國事乎為已事乎然京之所以語人者曰我助惇而惇不聽也我故絕之我教卞而卞不從也我故怒之我與弟卞不相往來久矣我緣國事今與弟卞不相往來而況于惇乎臣竊料京之所以欺陛下者亦必以此言也何以驗之卞之赴江寧也京往餞之期親遠行法當賜告而京之所以牒閭門者初以妹行為請法不許也遂請朝假終不敢以弟卞為言雖在朝假日至國門之外京之動靜如此即不知陛下皆得其實乎此明主之所宜察也且兄弟同朝共議國事自無不相往還之理假使不相往還豈人倫之美事乎此天下之所以議京者四也陛下即位之初以用賢去邪為先而京之蒙蔽欺

罔會無忌憚陛下必欲留京于朝者其故何哉臣知陛下之意本無適莫而京之所以據位希進牢不可拔則以韓忠彥會布不能為國遠慮輕率自用激成其勢故也京卞國惡天下所共知若用天下之言以合公議則顯正二人之罪何難之有忠彥等不務出此而果於自用於是託之師謀而出之太原雖加之兩制學士之職而實以詭計除之想當進擬之時必有不情之奏用奇設策不由誠心二聖安得而無疑公議亦以為未允及京之留布復爭辯再三之瀆無以取信相激之勢因此而成陛下進賢退邪法則堯舜然而天下之心皆疑陛下有大用京之意者以京之復留故也京之所以復留者以忠彥等去之不以其道故也去之不以其道則留之者生于相激萬一京果大用則天下治亂自此分矣崔羣謂唐之治亂在李林甫張九齡進退之時今京欺蔑先帝與卞無異而又歸過于先烈賣禍於惇卞曲為自安之計而

陛下果留之也今既可以復留後亦可以大用天下之勢繫于一京崔羣之言可不念哉臣恐後之視今亦猶今之視昔禍亂之機亦不可以不早辨也陛下嗣位之初首開言路可謂知所先務矣臣愚首預茲選則知京在朝廷必為大患而不能以時建言萬一有意外不虞之變陛下幡然悔悟誅責當時言事之臣則臣雖碎首陷胷何補于事此臣之所以憤懣而不敢默也臣嘗為卞所薦與京無纖介之隙所以言者為國事耳非特為國事也亦為蔡氏也且京卞用事以來籠絡薦引天下之士處要路得美官者不下數百千人其間材智藝能之士可用之人誠為不少彼皆知京卞負國欲洗心自新捨去私門顧朝廷未有以招之耳臣謂京在朝廷則此數百千人皆指為蔡氏之黨若京去朝廷則此數百千人皆反為朝廷之用所以消去朋黨廣收人才正在陛下果于去京而已此非臣之臆說乃神考已用之術也在昔熙寧之末王安石呂惠卿紛爭以後天下之士

分為兩黨神考患之于是自安石既退惠卿既出後不復用此兩人而兩門之士亦魚取而並用之也當時天下之士有王黨呂黨之禍終不及朝廷者以此然則消朋黨之術惟在去京而已今京闕通交結其勢益牢廣布腹心共成私計羽翼成就可以高飛愚弄朝廷有同兒戲陛下若不早悟漸成孤立後雖悔之亦無及矣自古為人臣者官無高下干犯人主未必得禍一觸權臣破碎必矣或以為離間君臣或以為賣直歸怨或以他事陰中傷之或于已黜之後責其怨望此古人之所不免也臣豈自愛其身乎若使臣自愛其身則陛下不得聞京之罪矣國家內外無事一百四十一年矣太平之久古所無有甚可畏也譬如年老之人康健無疾日服溫煖猶恐氣衰至于保養陰邪必成腹心之疾京在朝廷何以異此伏望陛下謹保祖宗之業獨持威福之柄斷自宸衷果于去惡則天下幸甚

李綱論福建海寇劄子

臣契勘廣南福建路近年多有海寇作過剽掠沿海縣鎮鄉村及外國海船市舶司上供寶貨所得動以巨萬計官司不能討捕多是招安重得官爵小民歆艷皆有倣倣之意臣恐自此為患未艾蓋緣兩路帥司並無戰艦水軍遇有海寇坐視猖獗不能進討止是於沿海擺布些少兵卒為保守之計賊船來去近遠不常並海之民罹其荼毒擄掠船船既多愚民嗜利喜亂從之者衆將寢成大患如晉之孫恩不可不遏為之備伏望聖慈特降睿旨常存兵於兩路鎮壓仍下逐路帥司委以措置戰艦招集水軍水夫常切教閱令士卒習于風濤之險以水夫駕舟以官軍施放弓弩火藥雖賊懼驪忽可以追逐掩擊殄滅一兩頭項則餘人有所忌憚不敢覬覦妄作庶幾海邦之民得被朝廷大賜不勝幸甚

朱熹乞褒錄高登疏

臣猥以塵賤備員偏州仰體聖明收用獎拔之意思竭駑鈍仰報萬分故於聽訟決獄不敢不盡其愚今幸踰年目前人戶些少曲直粗得其情獨有事在數十年之前而枉直之分舉錯之重或非州郡所得為者則在臣職不敢不具以聞伏惟聖慈特垂聽察伏見本州漳浦人故迪功郎高登資稟忠義氣節孤高少遊太學值靖康之禍嘗與陳東詣闕上書力陳闕賊之罪且言金人不可和狀在紹興間廷對力陳闕失無所顧避覆試官忌其直降為下州文學高宗皇帝嘉其忠而收之調靜江府古縣令是時秦檜當國帥臣胡舜陟以其父嘗宰是邑欲為立祠以悅其意而登獨持不可舜陟以危法中之召致獄官驗問訊掠訖無罪狀可書後為潮州試官又使諸生論直言不聞之可畏策闕浙水沴之所由檜聞益怒以為陰

附趙鼎削官徙容州以死檜歿之後諸以口語為檜所陷者高宗皇帝深察其冤巨細存亡無不甄錄而登以遠人下士獨無為言之者至乾道間近臣梁克家等始援紹興二十六年赦書以請而有司拘文廢格弗下近歲守臣傅伯壽又嘗具奏如前今已踰年未奉進止是使登以抱恨沒身垂五十年而姓名猶在罪籍未蒙昭洗雖其孤忠自信獨立不懼精爽凜然必不以此為悔而在聖朝伸冤雪枉勸善懲惡之意則議者猶竊恨焉臣幸得蒙恩假守其鄉目覩茲事若又緘默不能上聞雖萬被戮不足償罪是以敢冒言之伏惟皇帝陛下御極以來虛心克己容納盡言比以陰陽失和申詔近臣樂聞至論草茅之士雖有枉直過甚之言始雖忤旨終薄其罪竊揆聖志如登之忠直宜在矜獎欲望特發德音復其官秩量加褒錄以慰九原且使天下之欲為忠義者知所勸慕誠非小補臣不量疎遠干犯威嚴無任震懼隕越之

至謹錄奏聞
伏候勅旨

鄭樵上通志書

臣本山林之人入山之初結茅之日心苦志遠欲讀古今之書通百家之學討六藝之文而為羽翼如此一生則無遺恨忽忽三十年不與人間流通事所以古今之書稍經耳目百家之學粗識門庭惟著述之功百不償一不圖晚景獲見太平松筠之節不改歲寒葵藿之心難忘日下恭惟皇帝陛下誠格天地孝通神明天縱之聖日新之德君臣合道一言而致中興切見兵火之餘文物無幾陛下留心聖學篤志斯文擢用儒臣典司東觀內外之藏始有條理百代之典燦然可觀臣伏觀秘書省歲歲求書之勤臣雖身在草萊亦欲及茲時效尺寸顧臣究心於此殆有年矣今天下圖書若有若無臣雖不一一見之而皆知

其名數所在獨恨無力抄致姑能紀之耳謹搜盡東南遺書古今圖譜又盡上代之鼎彝與四海之銘碣遺編闕簡各有倫次天篆梵書亦為釐正於是提數百卷自作之書徒步二千里來趨闕下欲以纖塵而裨嵩華涓流而益滄海也念臣困窮之極而寸陰未嘗虛度風晨雪夜執筆不休厨無烟火誦聲不絕積日積月一簣不虧十年為經旨之學以其所得者作書考辨訛作詩傳作詩辨妄作春秋傳作春秋考作諸經序畧作刊謬正俗跋三年為禮樂之學以其所得者作謚法作運祀儀作鄉飲禮作鄉飲駁議作系聲樂府三年為文字之學以其所得者作象類書作字始連環作續汗簡作石鼓文考作梵書論作分陰之類五六年為天文地理之學為蟲魚草木之學為方書之學以天文地理之所得者作春秋地名作百川源委圖作春秋列國圖作分野記作大象畧以蟲魚草木之所得者作爾雅註志作詩名物志作本

草成書作本草外類以方書之所得者作鶴項方作
食鑑作採治錄作畏惡錄八九年為討論之學為圖
譜之學為亡書之學以討論之所得者作羣書會紀
作校讎備論作書目正訛以圖籍之所得者作圖書
志作圖譜有無記作氏族譜以亡書之所得者作求
書闕記作求書外記作集古系時錄作集古系地錄
此皆已成之書也其未成之書在禮樂則有器服圖
在文字則有字書有音讀之書在天文地理則有天
文志有郡縣遷革志在魚蟲草木則有動植志在圖
譜則有氏族志在亡書則有亡書備載三二年間可
以就緒如辭章之文論說之集雖多不得而與焉奈
秋先蒲柳景迫桑榆兄弟淪亡子姓亦殤惟餘老身
形影相弔若一旦倏先朝露則此書與此身併填溝
壑不惟有負平生亦有負於聖時謹繕寫十八部百
四十卷恭詣簡院投進其餘卷帙稍多恐煩聖覽萬
一臣書可採望賜睿旨許臣料理餘續當上進得展

盡底蘊然後鵬歸蕙帳狐正首邱庶幾履陛下之地食陛下之粟不辜為陛下之一民也

明林揚奏蠲虛稅疏

福建福州府福清縣海上里民臣林揚謹奏為懇蠲虛稅以救遺民殘喘事臣聞民非君罔克胥匡以生君非民無以辟四方然民之資于君者三而君之資於民者二饑寒非君不適勞苦非君不逸危亂非君不定君而能此三者則曰克厥后而副下民之望國家之威非民力不張國家之需非民財不裕民而盡此二者則曰盡厥職而不干天之威倘民不聊生何以効力民力既竭又何以輸財然必上恤民命而惟三者之盡斯下民永懷而收二者之功此上下相資一定之理也臣揚祖林如大仕宋晚歲歸隱遯居海島臣等生于荒山長于草萊恭遇陛下龍飛淮甸乃聖乃神乃武乃文一二伐而吳越肅清數十戰而閩

楚悉平民已安矣物已阜矣然而聖德廣大念周遐荒以臣等羣居隔海缺乏城池乃發德音下明詔徙之內地以康其生非為有罪而比之罰為生民立命為國家樹猷誠有以超前而軼後矣臣等欽奉聖諭罔敢違越不意奉命之臣不能上體聖意下悉民情文移星火勢急雷霆三日之內驅臣等登舟焚臣等房屋折臣等基址臣等倉卒舟楫難完遺其器物搬其畜養糧食不能盡隨資財多致失落兼風濤大作人力莫支覆沒之餘死亡過半臣等隨波逐浪遇地拋泊父子兄弟不能相顧時蒙聖心軫念下寬恤之詔遇官田得耕遇官屋得住但顛木柔蘂風霜易折衣衾殘喘氣息難延雖有官田無力得耕雖有官屋無力得修臣等日夜傾心跂足望聖明下甦生之令發撫綏之政如宣王之還定安集盤庚之懋建大命與臣等更始庶幾旦夕之命可延也奈臣等有極苦極累之事未蒙區豁閩海阻百越之遠淮甸隔九天

之遙聖目未經顛越誰恤使臣不言不惟今日無暫
安之期抑且身家有長擾之患不惟今日有死亡之
慮抑且子孫有永累之苦幸陛下之聰明容納而可
言臣等抑鬱困屯而不容不言故敢冒昧為陛下言
之臣等舊居福清縣海壇山周圍八百餘里田地七
百八十四頃糧米五千餘石鹽額正耗五千餘斤夏
稅秋租為錢三十餘萬文魚課二千餘擔民戶雖遷
額數猶存追徵期至有司按籍科派皂胥憑文追取
主撮難移秋毫莫貸生者代死者之納存者代亡者
之償臣等產業既廢囊篋俱空疲骨監拘妻兒繫縲
官田不敢貿易官屋無人承買雖欲負瓦荷椽伐桑
易鎡其可得耶敲朴之下何計可逃以半菽不飽之
民攜孱弱餘息之女以單衣忍冷之母抱疇嬴欲死
之兒持券街頭垂洟叫鬻賠納未回批文又至械繫
流離道路困踣賈生已遠誰上痛哭之書鄭俠不逢
莫圖可憐之狀遂使播棄遺黎十死而無一生十亡

而無一存拊心頓足追思遷徙之時不如淪胥以葬
魚腹之為愈耳臣思陛下昔日仁恩憐臣僻居被寇
轉于內地本欲安而全之不意今日業去糧存科餒
如故實乃死而亡之臣等何幸生當聖明之時與太
平君相同其世何不幸遭此轉徙之苦不獲與太平
草木同其生且臣一身之微不足顧萬口之流離實
可憫臣一家之沒不足惜滿路之哭聲實可憐故臣
不避斧鉞之誅甘觸雷霆之怒昧死籲天忘生叩地
仰惟陛下創立鴻基覃恩四海頃者頻蠲田租澤被
草野屢省刑罰德施蕩蕩豈意陽春不播于寒谷日
月莫照於覆盆使臣等之苦至此極也伏願陛下覆
幬無私容光必照除虛繫之稅額清逃亡之戶口恤
其饑寒救其疾苦定其居而授其田奠其生而撫其
傷使亡者復勞者息槁項疲癯者稍甦與盛世蛸飛
蠕動者同呼吸於草澤而子子孫孫永為陛下之畜
民此乃下民之福實陛下大造之恩矣臣揚謹昧死

親貴上奏臣無任惶
懼戰慄待命之至

陳汶輝奏薄征下壤疏

洪武二十五年四月十日吏科給事中臣陳汶輝謹
奏為薄征下壤以息邊民事臣伏讀周禮當歎其治
出于極文之後而直接於唐虞夏殷之先雖秦漢刪
文返樸之令皆無及者豈不以治當酌時勢之宜不
責於文質之守國家建治實準周官三公六卿之守
無不阜成而司徒保息之方則未體悉邇者命官沿
邊建堡周於防禦殊未知民居離散無可防禦者則
今雖防民之奸而實未嘗養之于善也創業垂統之
始可如是乎臣伏觀沿海士民荒饑之後困苦之狀
皆由課征所致蓋其田廬沒於流沙而租課逼其輸
納陛下雖廣求民瘼參酌其便宜者以定其制而所
厚者洽于京畿平野之間而弗均於嶺海遐邊之地

愚臣以為當體周官保息之政以寬沿海沙壤之征田沒水者蠲其征園多沙者汰其米彼其民艱於耕作樂於寧息且逢豐稔之年雜以魚鹽之利漸致富庶易於成治不然魚鹽已輸矣而田園沙水靡常者又征之臣恐開國之初已不堪命民不寧居矣垂及百年官吏日以貪酷風習日以華侈風沙日以湮沒哀哀邊民呼無死所矣此豈聖聰所忍聞哉伏乞睿旨下沿邊諸郡勸明而削除之乃造冊以定其制庶幾遠近一體同享太平之休以接成周之治臣汶輝不勝感荷惶悚之至謹具疏以聞

林俊請急除逆宦劉瑾以禦大亂疏

自古奸邪弑逆之賊如趙高如石顯如李輔國程元振魚朝恩陳弘志如宗愛如蘇佐如王守澄田令孜楊復泰如劉季述如韓全誨凡可以危人主而破敗人國者劉瑾皆備之瑾古今惡魁也今近而京師遠

而天下皆曰兩皇帝朱皇帝劉皇帝又曰坐皇帝立皇帝今天至尊也帝雖為天所立不得並稱天故曰天子帝至尊也太子為帝之副不得並稱帝故曰帝子豈有給事之內臣得並稱皇帝哉國家成法制於太祖遵守於太宗至精密也劉瑾盡取而紛更之陛下尊為天子容制於一權宦不能庇祖宗耶大臣擇於孝宗至當也劉瑾盡誣而擯斥之劉大夏最賢禍最大劉健謝遷馬文升韓文楊一清許進馬忠錫又賢禍又大張敷華亦以憂死僅一林瀚俟命獨存是明與孝宗抗也陛下尊為天子容制于一權宦不庇其父耶太皇太后皇太后時被離間使純懿之主母忍下家奴之色受其挾取陛下尊為天子容制於一權宦不能庇祖母耶故事皇太子未舉舉未立親王一一位不之國為根本慮至深遠也劉瑾讒間榮王徑遣之國致陛下於孤立又且傲視榮王挾取其物無所畏忌陛下尊為天子容制於一權宦不能庇其

身與其叔耶。藩王金枝玉葉陛下同潢派者也。劉瑾吹毛刮垢日恣索害陛下尊為天子容制於一權宦不能庇其族耶。劉瑾安受皇親夏儒之跪拜呼呵叱咤無異市兒重索其金陛下尊為天子容制於一權宦不能庇外家耶。公侯駙馬伯非勲則親與都督等官皆朝廷之腹心爪牙同休戚者也。劉瑾罵唾騙索任情中傷又甚則不顧鐵券之誓平江伯陳熊身發充軍手下人發梟首致陛下盡失勲戚之心內閣九卿非賢則舊與科道等官皆朝廷之股肱耳目致太平者也。劉瑾誅求陵侮極力嫁禍今日杖某死明日枷某死又明日發某為民充軍又甚則已死之都御史錢鉞忍心種禍抄沒其家出差之都給事中許天賜尋事嚇財逼令自殺致陛下盡失文臣之心二十四監或歷事累朝或守禮職事陛下之侍御左右也。劉瑾敗羣傷類廢置自心今日易鎮守明日易掌印又明日易管事又甚則王岳之賜死蕭敬鄧原麥秀

扶安邱聚之閒廢罷黜致陛下盡失近臣之心指揮
千百戶或起艱難或繇勲績劉瑾故阻其替襲難其
比試今日調臬衛明日降臬官又明日充臬軍致陛
下盡失武臣之心屯田將無而作有稅糧既免而重
徵法令煩苛搔手犯禁官校聯絡觸眼無分致陛下
盡失天下軍民之心且一家之用為財易足也劉瑾
刮盡天下之財富於內庫非欲為逆暗邀人心何聚
財之多如是耶一家之居為屋易足也劉瑾蓋盡關
防之屋多於內府非欲為逆屯駐兵馬何聚屋之多
如是耶一家之乘為馬易足也劉瑾畜盡西北之名
馬非欲為逆給發騎兵何聚馬之多如是耶中外傳
聞劉瑾議將京軍邊軍更番上操為張永所阻奏將
京軍官校隨回祭掃為張永所阻信有之是劉瑾之
叛逆不特京師知之天下知之至同類亦知之矣獨
陛下未知也臣聞京師盜賊之起曰因劉瑾而致兩
直隸山東河南盜賊之起曰因劉瑾而致臣未詳也

廣東廣西福建盜賊之起曰因劉瑾指差查盤剝削
匱竭而致臣則詳知之江西盜賊之起因劉瑾指差
勘事剝削而致湖廣盜賊之起因劉瑾兩差計處備
荒索銀十數萬兩剝削匱竭而致則臣親詢之今四
川夔保藍伍等盜賊之起因劉瑾之革撫民播州寧
安天苗等蠻賊之起因劉瑾之庇楊友及剝削匱竭
而致臣則親審之又聞雲南貴州土夷縱橫盜賊充
斥亦因劉瑾多方誅求剝削匱竭而致而前日官軍
亂遼東今日官軍亂寧夏賊殺守臣僭立安化明以
共誅劉瑾為辭是劉瑾即未自反逼天下人已盡反
矣夫天下治亂係紀綱係人才係風俗今紀綱大壞
人才大壞風俗大壞猶敢矯誣毀謗謂亂起孝宗至
頒之詔旨謂欲振起綱維剗革姦弊會不思孝宗聖
仁寬大堯舜禹湯文武之君殷中宗周成王宋仁宗
之主也瑾恃虐召亂猶敢肆無忌憚誣謾先帝罪豈
容于死哉臣與劉瑾素不相識素無讐怨劉瑾斥逐

正人朝野為空獨臣一人幸免前年投無名奏內廷之時明對諸臣許臣忠義及今有巡撫之起臣宜以知已為報顧若操戈而入室者臣受三朝厚恩誠不忍坐視天下將亂宗社將危而不之救昔崔洪薦郅詵詵奏洪王鳳薦王章章劾鳳安祿山薦顏杲卿杲卿討祿山臣敢以一德之私廢天下公論宗社至計哉

陳泰處置福建地方疏

臣聞福建延平府沙縣強賊鄧茂七等作亂殘破尤溪等十餘縣殺死軍民男婦數多是蓋本處三司御史府縣官員於賊初生發之時不即具實奏聞以致賊徒倡獮遍處劫掠荼毒良善所在官軍又皆畏怯縮手無為重勞宸衷節命文武將帥統率大軍前去剿捕破賊之勢譬如破竹迎刃而解有不待臣言而

知切惟福建地方八府山路崎嶇溪澗陡險民性怯
關見賊風靡若不先分兵固守各府衛所城池及未
經殘破縣分緊關隘口阨其奔衝之路以保良善以
安衆心而遽以大軍徑進恐賊乘虛直奔無備府縣
良善被害尤多又賊情譎詐聞知大軍入境恐於隔
山隔水險隘去處或假來迎降或詐作嚮道引軍深
入設伏以待未便此皆不可不慮如蒙乞勅總兵參
將等官師行之時務須持重先於福州建寧延平汀
州邵武五府衛所各委能幹都指揮或指揮一員嚴
兵固守城堡又量分兵於附近賊巢將樂清流順昌
等縣扼其要路絕彼奔衝使犄角為援以固上游之
勢則賊進無所得退無所據然後率大軍直擣其巢
穴賊必潛於沙縣尤溪後山徑路下奔漳泉地方又
出奇兵由大道直抵漳泉追剿賊不遁於山必蹈於
海若遁山蹈海彼衆食少臨以大軍招撫其脅從以
披其黨分擣其賊壘以孤其勢則渠魁可以就擒全

閩庶幾完復賊平之後伏乞聖明祛除本處貪婪官吏寬恤各處疲敝軍民如此非惟福建一方生靈受惠而天下各布政司府縣貪官污吏從此知警良善獲安邦本永固誠億萬載太平之福臣身被誣枉久禁在監無以補報謹陳愚見昧死具本令某親齋謹具奏聞

鄭善夫諫東巡疏

臣聞芻蕘荒野皆得獻於君臣待罪禮官奉法無罪竊迹職事不能匡正萬一愧死無地近奉明旨有以威武大將軍鎮國公前往泰山獻香者竊念此事雖芻蕘草野苟有一念愛君蓋有蒙死而言其必不可矣況臣身有官守職與奉行者哉臣聞天子端居外屏以示嚴也非郊社弗離其宗廟以承重也宮牆九重出則警蹕以防奸也夫以天下大器權邪側目而不敢發者無其便耳陛下遠不見曹欽近不見劉瑾

乎瑾固陛下狎暱之臣也陛下託以心膂委以機務時
豈不以瑾為盡忠社稷且日在左右而一旦叛逆乃爾
況今乘輿遠出內無儲君外有勁虜而驕貴弄臣專
典禁兵萬一變作陛下誰保以無虞也陛下獨不聞
英廟之事乎前車之覆後車之戒臣不敢斷其必無
也且陛下遠舍宗廟以祀泰山誠以為社稷人民邪
臣聞雨露所滋無不孳息雷霆所歷無不摧折煦然
而福肅然而威萬化時行百神率職者天也泰山之
神其有尊於天乎故凡在天之下者祖宗相承之社
稷人民也今以付之陛下誠欲陛下敬天之威和其
人民保其社稷而能享其宗廟獻香之事其有重於
郊社之禮與禘嘗之義乎今陛下郊不視牲齋不誓
戒改卜者三出而馳道恐非所以事天享帝也禘嘗
大禮率不親往恐非所以尊祖敬宗也是故園丘之
上烈風揚沙太皇太后祔廟之夕而七月雨雹此天
戒也陛下顧不動心敬此天戒乃輟萬幾冒重險以

事於泰山何哉臣見五岳之神不啻天之僕隸也暴慢於主翁而敬恭於僕隸不待智者而知其必不敢享也況今民窮財盡青齊淮楚之間水旱連年甚至父子相食者六飛一過勢必嘯匿山谷倘重傷心更何以徵福於社稷哉夫興亡之勢皆積漸而後成然不可不察也陛下連歲北巡而為陛下留行者抗言有害而未見其害非惟無害而反有利宜陛下厭言者之無稽而果於獨用其意也臣愚以陛下之病漸成矣昔扁鵲再說齊君不用三見而遁去嘆曰昔公疾在腸胃湯藥可及也及在腠理針砭可及也今入骨髓矣雖有司命將奈之何哉臣恐失今不治而扁鵲遁矣天下名實方懼大怪春秋尊無二上制王公而下皆曰人臣今忍以天子之尊自貶而稱公此莫大之怪也非但大怪也然必有大憂今天下藩王皆陛下臣子也車駕所至萬一以公禮處陛下將安而受之耶抑責其不臣無禮耶明明祖訓臣恐彼有執

詞矣且陛下之所欲自封者豈不以雄資大畧自足累功將相耶然任金革暴霜露縱能手格單于身甚勞而功固甚鄙也臣聞堯舜惟恭默無為而萬世言治不聞其擅一將之長今不師堯舜則亦已矣亦不聞有先帝乎先帝敬天勤民親賢遠色察佞幸絕遊畋亦惟自正其心以為天下本實未嘗有所作為下親將相之事也然而文武効用身不勞而天下治此陛下與左右所習知者陛下夜氣清明之時獨不一思先帝之所為乎臣竊以治亂之機實在陛下一心一正則百邪皆廢陛下試一轉移靜求先帝何故身不勞而反治今何故身獨勞而反亂則一切荒淫悖謬之事將自追悔不暇只此一念欲成堯舜事業不難也夫以陛下之聰明英武顧不惜勞瘁其身以求治而豈惜一念之轉移哉惜無明智者早為陛下陳之也臣本草茅久無仕進之志痛惟先帝祝天求才不忍以無用自棄抱此惓誠久欲獻之陛下明知

職非言路寧觸忌諱以死誠惜陛下之英明而
不忍視天下之日敝也隱死上聞候命闕下

謝黃復舊河疏

謝黃謹題為復舊河杜夷患以安地方事伏見福建
地方僻在一隅依山濱海與琉球日本諸夷相接我
朝創制立法沿海設備倭之戍巡海有專任之官其
慮患周且密矣但諸夷之變詐無常而中國之思患
不可不審苟非防之于無事之時又安能制之于有
事之日耶且琉球入貢必由東海而入至閩縣柔遠
驛安歇乘風順潮數日可到緣本省城池自晉改造
以至于今海門潮汐錄閩安鎮歷閩縣鼓山歸善崇
賢高惠四里計有三十六灣周流縈迴抵河口水部
門散入城中諸河譬如人血脉周流于身營衛自有
條里以故夷人入貢番船必候風潮撐駕曲折數日
然後可以至驛縱有他變不能飛渡安斯民于衽席

保城池如金湯也弘治十一年間鎮守鄧太監利夷貢之便改易從古舊河竟將上王地方鑿透大江名曰新港是若人之一身塞其血脉之周流惟此咽喉之直致貢船雖便其往來地方多為其虧害姑以其要言之水勢直達江河無別抑或夷性無常如近日寧波倭夷之仇殺非惟居民受其荼毒而省城難保其固也此其為害一也新港之開將本州膏腴民田鑿斷一頃有餘以致浮糧在戶累年賠納糧差此二害也又港門水急舟楫往來即為激破橋梁累為衝塌遞年輒費有司脩理此三害也夏秋之間洪水泛漲濱河田土被其崩陷貧民賠租稅此四害也南臺河口臨江人家房屋多漂流數年之內十室九空此其為害五也舊河三十六灣之水迂迴紆緩遠近田土資其灌溉者約萬餘頃今水利不通田皆荒蕪齊民將棄業而逃矣此其為害六也載觀昔八閩志所載晉郭璞遷城記有曰逢兵不亂逢饑不荒晉乃樂土

也一自新港之開舊河已塞水失故道禾稻損傷倉
無餘積庫無餘財邇年強軍作亂幾陷城池議者皆
歸咎于新港之傷也本縣耆民馮驥等累將此害赴
愬鎮巡屢有准行者或惜於工費歲月因循莫有任
其責者矣今舊河不復新港不塞第恐水勢難移終無
止極非惟桑田變成滄海而外夷窺覘之禍強軍倡
亂之謀或生蕭牆之內矣然新港之塞橫澗只有數
十餘丈為力甚易舊河之復除水道尚流外其壅者
只有四里之餘少加疏通則潮汐往來水由故道近
功亦可成焉計其成功杜其後患此先事者之所必
憂也臣生長于斯目擊其害深為地方之慮輒敢冒
陳伏望皇上軫念遠方勅工部轉行福建鎮巡官設
法將舊河疏通新港填塞則外夷之禍患不生生民
之樂業以遂而城池鞏固邊方無虞臣無任悚惶待
命之至

陳真晟奏正風教疏

福建鎮海衛布衣臣陳真晟謹奏為正風教事臣切惟今天下彌文矣故臣不敢更飾浮詞而輒陳鄙見焉臣伏觀丁丑科廷試錄見聖制篇首之問有曰古之士進以禮退以義為上為德為下為民今何其立功之志溺利祿之心勝奔競之風未息廉介之節少著其失安在臣即是而觀甚知陛下有思古慨今之意也至其篇終又曰今欲士正其習民淳其風庶幾唐虞三代之盛必有其道務求切至之論將擇而行此可見聖志將大有為可謂千載一遇之問而天下萬世之福慶者也故臣謹採先儒之說為小書一卷題曰程朱正學纂要來上亦竊效廷對之意也大抵三代所以盛者學校興師道立而心學正教明於天下也後世雖有學校之設然專以科舉俗學為教殊不知俗學益盛則心學益廢此自然之理是無怪乎

士習不正民風不淳而三代之治久不復見於今世也然則為今之法當何如哉臣聞父師之論而得一說謂可且就科舉之後補此一教如程朱所定三代學制之法再假以一二年聖學工夫然後除授如此則俗學稍輕正學自重人相習尚積成風化不患三代之不能復矣所謂深求切論可擇而行者殆有在於此乎然此非臣之言臣父師之議也非臣父師之議實大學或問所謂兼補之法也雖或問主為學者自補而言然司教化者朝廷也與學者自補其學于下孰若朝廷通補一教于上豈不周徧廣大尤足盡朱氏立法之意哉況心學既明不惟有以正士習于天下尤足以示道統之真傳俾皇家聖子聖孫常得見間帝王心學非但口耳講說如漢唐宋元東宮之教而已則方今急務又豈有大者哉臣布衣至愚且老濱死之餘萬無圖富貴之心然奉明詔言得失得失之本莫大於此故臣願效一言而歸死山林瞑目

焉伏望聖裁倘可採而行殆皆先儒之本意云臣無任昧死之至謹具奏以聞

鄭一鵬黜邪說正大禮疏

先王之禮莫重於宗廟宗廟之禮莫重於宗法繼嫡之宗謂之大宗嫡子之嫡若孫是也繼別之宗謂之小宗支子之嫡若孫是也大宗之次為孫小宗為祖亦必率小宗之宗宗之大宗無後則小宗立當後者以後大宗則謂大宗為父母小宗為伯叔父母其所以必後大宗者何也重祖也大宗則繼祖之宗不可以絕也大宗絕則祖絕矣故不得已父無可繼祖不可以絕此聖人立大宗之本意也武宗皇帝崩逝陛下以小宗入繼既以兄弟之倫不得考武宗則考孝宗而母昭聖正合小宗後大宗之義此天理人倫之至萬古綱常不可易者也既後孝宗則恭穆獻皇帝豈得無後乎禮官初議立崇仁王為獻皇帝後世主一

國為萬世不祧之宗此亦天理人倫之至萬古綱常不可易者也今建室之議既違古典而立後之議未及時定臣不知獻皇帝之祀果誰主之耶若俟皇儲繁衍始以繼獻皇帝之祀則是以孫繼祖豈所謂名正而言順者哉至于席書等邪說臣請為陛下辨之夫謂陛下事體與宋英宗不同似矣英宗父仁宗以仁宗大宗當繼也非以養育之恩也以恩而論則養育之恩小父母之恩大是英宗就小恩而忘大倫焉得為孝假使英宗未嘗育於宮中光獻援而立之英宗得不考仁宗而母光獻耶又謂陛下本孝廟之姪不得稱考則古所謂小宗後大宗者必大宗無子而後立小宗之子以為之子不然聖人何以制為後之禮使人不父其父而父大宗耶且立後之禮雖先王之典我祖宗實酌而行之如書等所言則祖宗不應制此禮矣天子七廟父昭子穆以次為序未聞別有所謂廟者所以重大宗也今太廟之外別立一廟是

大宗之外復有一大宗也且陛下考孝宗而母昭聖告之郊廟播之天下固已知陛下為大宗後矣書輩必欲陛下盡改詔書不惟無以慰祖宗在天之靈而欲駭中外臣民之聽矣臣竊觀陛下於蔣冕之奏則曰朕奉太宗之義未嘗有間于臺諫之奏則曰為後大宗未敢有偏陛下此心天地祖宗實所鑒臨是陛下固已知其不可為必不為者矣書輩必欲陛下為之臣未知其何說也又謂陛下倫叙當立皇太后不得而預者夫漢諸呂之亂諸大臣欲立文帝使宋昌觀變而後敢入當武廟賓天海內無主內有魏彬張銳之黨外有逆彬等竊倒持之柄睥睨神器皇太后因先帝遺詔慙建大策親挈大寶授之陛下出邊兵勞軍士擒逆黨使幾搖之社稷指顧肅清陛下按轡清道入為太平天子功德隆重視宋宣仁實過之今乃橫加指斥直謂太后無預不亦逆天悖理之甚耶夫陛下倫叙當立皇太后援而立之此所以為大功

大德若如其言必欲立不當立者始為功耶夫臣子於無禮君父者逐之如鷹鷂之逐鳥雀也臣于書義不戴天寧忍與之並立於朝耶

黃仲昭諫花燈疏

切惟某月日內閣遣郎中定持至揭帖東閣及史館分與翰林諸臣令各賦烟花燈等詩備明歲上元賞翫者臣等伏覩陛下即位之初首下溫詔赦田租絕貢獻蠲逋負停不急與民息肩天下欣然頃因災異勅諭羣臣同加脩省日擊耳聞拜手稱頌以為陛下真遊心經術邁跡堯舜今締觀烟花燈諸詩舊式率多鄙褻之語安燕之詞臣等復賦諒不出此輒相私語陛下明聖所不留情或者以歡宴兩宮助孝養萬一臣又伏見兩宮母后恭儉慈仁著聞中外久矣今者兩廣弗靖四川未寧遼左雖云告捷敵情尚

難測量江西旱乾以數千里其他災傷之處未能悉數雖蒙詔恤公私匱乏殊可寒心此陛下宵旰焦勞兩宮母后同憂之日也翰林之官論思為職宣宗章皇帝御製官箴有曰啟沃之言惟義與仁堯舜之道鄒孟以陳若以燕樂鄙棄進之君上曲引蘇軾宋祁教坊致語為解是不以仁義堯舜望陛下也伏願採芻蕘之言端耳目之好移此視聽為文如傷為舜若決省此冗費以活流離以賞勞役書曰不矜細行終累大德又曰不役耳目百度惟貞惟陛下深思力行之

林蘭友上用人誤國疏

謹題為聖明多破格之盛典臣子乏矢報之實心謹瀝敬忱上陳聖鑒以佐求賢圖治之謨用成大法小庶之化事臣宗禎四年進士奉旨以邊荒多故選方積獎應選甲科除臣廣西桂林府臨桂縣知縣臣至

地方正宗藩搆難之時會城若沸邑治為荒臣備極
苦心消萌弭變獲有成勞蒙聖主臨軒召對親賜御
題臣南人也咫尺天威語言踟躕伏蒙聖恩欽定臣
南京湖廣道監察御史留都祖宗開基重地皇上以
南用臣必不以南外臣亦安敢以南自外諸南中
江防城守國計民生風紀之地法有必行激揚之司
職可自盡者臣至其中力圖報稱惟是臣自筮仕以
來伏見皇上破格用人苦心無不卓越千古而諸臣
潔已奉公一念未免負愧明時鼎鉉要地或視為持
祿養交之途軍國樞機至等為窟蠹養癰之藪大臣
如此小臣何所奉以為程輦轂且然遐陬奚所憑以
為式如揆席係天下安危重任也皇上破格而用外
臣張至發臣竊以必有若裴狄韓范之品可以宏濟
時艱乃三年輔政已同伴食之中書半載秉衡遂多
沸騰之物議栗擬屢誤經畫無聞則至發之負皇上
也至發不足論矣輔臣薛國觀為禮科時磨勘曹鳳

補試卷既知其悖謬不通乃脫狗不舉且以該科摘
叅之職掌妄卸部司欺罔聖聽舉朝噴噴咸抱不平
臣竊以綸扉重地而有此縱奸翫法之臣異日亦何
能為奉公絕私之事且覆試者未結下獄者未訊應
處者未分別國觀獨以一疏預鳴超然事外謂國紀
何則臣之所失望而欲上陳者此其一又如銓臣為
天下統鈞樞臣關中外安攘重任也皇上破格特擢
而用田惟嘉奪情而用楊嗣昌惟嘉鬻爵集賄已有
煩言甘負皇上誠可痛心若嗣昌者自拜命以來十
面之埋伏空聞千銓之一刻輕擲選將而特果得人
乎辦賊而賊果授首乎一十二萬之兵保無空籍二
百八十餘萬之餉究無虛糜乎一聞有事于宣便已
束手無策惟思言市言賞為苟且僥倖之圖是豈皇
上所以奪情嗣昌意乎甚而星變示警在皇上方青
服減膳回天之誠以祈消弭而嗣昌且附會援引為
前代不相涉之言以煽禍祥而駭中外臣愚不識其

何心且作忠者必于移孝嗣昌拊心自想必進而有以自靖于清時乃退而有以自解于明發不然而忠孝兩無所據則嗣昌之負皇上也臣之所失望而欲上陳者又其一茲者枚卜方新朝野想望宜勅廷臣矢公矢慎即內外可以無拘資序可以無循但期得公清正直之品闕深博達之才如中國相司馬戒無開邊釁者以應皇上破格之求而躋一世蕩平之治蓋今天下寇盜內訌民生凋瘵譬之人身官骸無恙脈理之間重成蠱豎非得一國手名醫亟為調劑且有顛蹶不支之患夫惟揆席端則六曹無不清之政理由是卿貳肅而天下無不舉之職司則臣之所失望于昔屬望于今而欲上陳者又其一臣新進小臣惟思以忠愛二字自矢一得于盛明而尤欲以精白乃心徧告靖共于有位臣即拜手南行猶之瞻天尺五也抑臣更有進焉凡茲同考諸臣今日之館員即異日之鼎台今日之臺省即異日之楨幹柱石俱蒙

皇上舉不世之曠典臨軒特拔各宜罔愛頂踵俯竭涓埃以共酬皇上一日知遇之榮臣犬馬報主之私不勝冒昧激切待命之至

彭韶星變應詔疏

臣聞更新曰始成功曰終邇者歲暮正旦星變兩見歲暮功終正旦新始善始如終天心仁示陛下也昔魏徵陳十漸之疏唐宗嘉納臣愚妄謂今日治毋他求惟守成化之初足矣伏惟成化之初陛下廢立中宮家禮嚴矣年來間鎮守內臣貢獻萬貴皇妃位下或如中宮上又獲陞其家幾與先帝時后家埒陛下若俯念四海為家之義少納臣子家衆之言以時裁正俾彝倫攸叙而陰陽不調災害不弭未之有也此陛下正家之禮有未終者也成化之初內侍稀簡防微深矣近大小名數漸增且以萬計利源兵柄多付

其手違禁犯科少有加罪求得請從陛下久御明事
何不及此時斟酌裁省俾內外之務各還職守立制
傳後無使異日偏重勢成更張不得此陛下慮防之
意有未終者也成化之初禁止天下貢獻儉德著矣
數年鎮守公差爭求珍異充貢茲又令獻方物悉如
天順三年以前例夫其名充貢奉實剝民財水陸勞
擾人馬疲頓私室被恩公家歸怨誠無益也古人遇
災皆欲減膳撤樂豈宜轉令為此此陛下持儉之德
有未終者也成化之初保傅寺監衙門多以高官兼掌及
卿輔臣無故輒加保傅寺監衙門多以高官兼掌及
其致仕恩澤又予月米歲夫陛下為此無非所以禮
大臣也然施于忠賢勞烈則人感人奮若泛行之孰
不阿順從欲圖後寵哉此陛下用人之道有未終者
也臣聞因事為功古人所貴鑒往慎來所謂謹始謹
而勿失所謂善終書曰終始惟一時乃日新
又曰德日新萬邦惟懷此真大聖人事也

詹仰庇請賜蔡清諡疏

萬歷十五年都察院左僉都御史詹仰庇題為一代醇儒公論已定表章猶闕懇乞聖明核實賜諡以示勸懲以光人文事臣惟帝王之治莫先乎重道而崇儒夫重道崇儒者帝王所以礪世磨鈍也風化人心世道國脈於焉攸繫臣伏觀我朝治教休明皆由列聖相承以此為首務我皇上紹隆聖統茂明帝學尤孜孜汲汲加意儒碩而表章之是故士之幸而生於我朝其脩身得道妙契聖賢之真傳如薛瑄胡居仁陳獻章王守仁者既得進而從祀孔庭廟食百世其飭躬砥行確守聖賢之正軌如羅倫羅洪先者亦得諡為文恭為文毅以六品之秩而被華袞之褒蓋所以闡揚往哲廣厲來人風化以振人心以淑世道有所維而益盛國脈有所培而益昌矣乃臣之愚以諸臣之外有德足以從祀而俎豆之議未遑賢足以

得諡而易名之典未及者則於臣鄉得一人焉南京
國子監祭酒蔡清是已按清平生事實臣聞之故老
讀其著書考諸皇明政要理學名臣錄通紀吾學編
憲章錄八閩通志之所紀載參諸海內縉紳之所議
論確然有據者敬為皇上陳之清以成化甲辰進士
為禮部主事三年調吏部復除禮部既而乞南既而
請告正德間起江西按察司副使提督學校當其時
寧庶人內蓄異志外以虛禮與士大夫相結寵以智
數脅以威權蓋無不遊其彀中者清獨守正秉禮矻
然特立故事三司以朔朝王次日乃謁孔子清請先
謁孔子而後朝王至其賀王誕日清又獨去朝服中
蔽膝寧庶人叩之于是有乘間言清與先臣林俊厚
者寧庶人益忌清清遂引疾去嘗語人曰寧藩所謂
智足以拒諫辨足以飾非今雖逆節未萌然竟可慮
但願老天助宋而已蓋是時清已豫見其微矣既家
居杜門埽軌潛心力學以六經為正宗四書為嫡傳

周程張朱為真派研窮細繹摩擬闡解有四書蒙引
易經蒙引性理要解諸書蓋朱熹發明聖賢之旨而
清又發明朱氏之言四方學者宗之至今不廢乃其
勵志好脩省身克已行不愧影寢不愧衾則又見于
密箴一書今觀其言皆身心性情之實功而不事口
耳皆天下國家之實用而不為眩虛與瑣之讀書錄
實足相擬先臣林俊稱其凝重端雅操養力專而進
取之念畧好古篤信真風淵軌使人躁息妄消鄭曉
稱其明經博學行潔心醇氣清而色和外簡而內辨
可謂知清者臣嘗取清生平反覆論之力抗藩王獨
立不懼勁節也方寧庶人舞智炫才威有賢稱而明
炳幾先覩于未形早見也超然遠邈不俟終日亭亭
物表皎皎霞外高行也平居非聖人之書不觀非聖
人之道不談正學也躬行實踐不愧屋漏真脩也朱
熹有功于聖人而清則有功于朱氏羽翼經傳折衷
羣言即今經筵日講虎觀諸儒臣之所勸誦亦多採

其說推之四方家傳人誦為人士式佐國家萬年同
文之治於無窮懋功也若其屢辭名位而不居退甘
窮約而不愠官至四品家無數金恒借貸于人以為
生貴而能貧此猶具細者而衡文隲士藻鑑精明識
陳琛于埃塵拔舒芬于困滯賢人魁士多出其門此
亦其餘緒耳臣嘗以為使當時江右諸司得如清輩
數人則据經守正當有以逆折寧庶人之奸萌而淮
南之謀必寢使清不去去而不死且復用則弘識訐
謀當有以匡持乎時事而東山之望必售使仕者而
知所景行則澹泊寧靜必無干名競進之心學者而
知所向方則篤實潛脩必無好高為人之病士之明
經應舉者但習清之書守清之說而不倍則其所為
文粹然一出於正又安有離經叛道操戈入室而流
於二氏六子之歸者哉皇上方留心九經崇尚正學
惟士習文體為奉孝臣謂欲端士習而正文體則請
表章此一臣以風天下而所謂表章之者惟有從祀

及諡典耳曩議從祀在廷諸臣多言清當從祀者後
以其典重而舉不欲輕姑緩以俟論定臣愚謂清之
賢無媿於薛瑄胡居仁陳獻章王守仁羅倫羅洪先
之儔即從祀之典未及再議若且予之諡則確乎其
不為過皇上試舉清人品詢之在廷有能真議者乎
試舉蒙引一書有一人不誦習者乎試詢以諡之與
從祀當否有稱不當者乎蓋非私論實在廷諸臣之
論也亦非臣及在廷諸臣之心而四方人士所共仰
望之心也抑臣又有感焉前代從祀率不乏人以區
區之宋自周張程朱四子外猶有邵雍司馬光楊時
胡瑗歐陽脩等乃獨我朝二百餘年而始進一薛瑄
往歲而始進胡居仁陳獻章王守仁三人則已誇詡
以為盛即以造詣踐履篤實純粹如蔡清者猶然靳
之俎豆不得儕于楊時胡瑗之列何我明之不逮宋
遠也無亦持議者操疑難之心甘于所聞淡于所見
屈服前代而求備當朝遂使俊偉之流品湮鬱于評

論之苛而昌熾之人文過佚于慎重之過乎臣願皇上加意一代之規稍弘崇獎之路勅下該部查訪如果臣言不謬先將蔡清比照羅倫羅洪洪先二臣事例賜諡易名而從祀之典不難再議而續舉焉仍將我朝諸理學儒臣傳訪精核或當請諡或當請祀一體表揚令人知聖意之所嚮相與脩實行崇正學具于風化人心世道國脈所裨非淺鮮矣

洪朝選條山東疏

臣少讀書見孔子富庶之論孟子樹藝稼穡之言未嘗不諄諄也其在成周則田官之于農民至嘗具饋食之旨否朔而及于上古則幽公于民至導以耕獲之時月而田畯之官實昉于此西漢以來此風未替勸課農桑勸農勞農之吏班班不絕至于教民種幾本薤幾本葱幾本榆亦登之傳中以徵循吏之政此

無他人道惟在衣食衣食足則禮義生不足則閭閻踰越此生民切要之務也臣觀山東地方北鞏京畿南引江淮東控遼左西連宋鄭中原一要地也而舉目盈望寥寥斷烟黃茅白葦焦崖赤岸車轍所過十邑而九問其人逃亡也問其地不耕也問其俗則緣南畝者無幾而鑄山煮海打洞採礦馳馬試劍充物東西也夫親民有郡郡有守郡以下有縣縣有令從而問以富庶之職茫然也朝而視事夕而課功月而視成歲而徵會不過急賦斂聽獄訟治文書謹期會而已有招流亡墾荒地者乎有巡阡陌教樹藝者乎宜乎東民流而不復東地棄而不耕也欲庶民必求庶之之本欲富民必求富之方山東之驅民而逃者里甲也均徭也驛傳也是三者人視之如湯火也使守令克知其職設誠如意里甲節也均徭平也驛傳輕省也則雖驅民使逃亦不肯也民不逃而地耕矣夫守令皆莫不知而皆莫之肯為也彼見凡為守

令者但能急賦斂明曉斷治文書謹期會職盡矣臣
愚欲乞勅下該部申明職事令其專一加意養民流
亡逃移必責之招徠荒蕪污萊必責之開墾而所以
招徠開墾必責之節里甲平徭役輕驛傳以為之本
聽臣別為三等以定舉劾能庶民富民而又有吏才
幹局者為上雖無吏才幹局而能招徠流民開墾荒
蕪者次之雖有少才偏能而不能招徠流民開墾荒
蕪者為下庶乎守令克知其職黽勉從事而古循吏
之風可見
於今日矣

周起元叅稅璫高宗疏

湖廣道監察御史周起元題為稅監剝民捐價迫殺
生命要挾重臣乞大奮乾綱速行正法以存國紀以
安地方事福建稅監高宗素行貪殘最于別璫歷年
海商一切貴重美麗奇巧之珍百入于宗與參隨未

必一貢于皇上臣生長之地耳而目之久矣谿壑既盈虐聲久播入粵粵人不受歸閩閩人震恐從此倘能稍斂虎威仰體皇仁與百姓安靜猶可幾幸旦夕自安不意益肆鴟張大開狼噬剝削閭閻彈膏竭髓我皇上取用各行物料即一草一木莫不按數予值家剝剝樓船連舸接舫揭百尺之桅檣窮雕飾之極麗所取物料浩繁概欲白沒彼市鬻貿易之夫挾貲幾何令一旦盡付烏有誰能甘之相率控取自無足怪何乃簡梟雄以作威陳利兵而相向揮刃戮二十餘人又放火燒三十餘家市民驚駭團擁喊集怨氣沖騰然擁集之衆不旋踵而解散者豈誠畏案哉蓋撫按禁約于上司道府縣曉諭于下毋敢抗法橫行以干三尺且又慮案造一偏之言以誑皇上反以揮戈放火誣坐小民萬里君門不易自白是以死者駢首就戮生者含冤解散竟不敢逞于一擊也案是時宜下罪已之詞自執殺人之參隨付之有司委心以

求解於院道東身以待命於朝廷猶可稍違萬分之一乃越日披堅執銳統率驍騎垂守衛之偶撤徑弄兵於轅門撫臣袁一驥節制一方為民造命案不能遂其竭澤之貪夙懷忿憤輒敢按劍要挾副使李思誠僉事呂純如將虎鬚以解厄案復留而要盟皇上試思從來稅監最貪最狠最毒如高淮梁永陳奉孫朝楊榮輩曾有殺人放火及刳節鉞要留方面如案之大逆不道者乎皇上利根未肯全撤釀成時事至此臣讀撫按疏揭叅以鄉人見聞不覺髮指而繼之以痛哭也近者邢洪馳兵器於禁地廬受假狐威於票擬皆漫不處分今案又見告矣望皇上亟行兩觀之誅用雪三山之忿非僅僅撤回墩鎖可以了事者臣聞省會人情洵莫不欲得案而甘心焉賴巡方與在事諸臣安輯撫綏幸未告變臣恐防川不決決必滔天宿火不發發必燎原萬一戈矛起於肘腋海濱因而動搖倭奴乘以生心案粉骨不足惜皇上豈

善為社稷計乎。宋之言曰：多進孝順，便可保全。首領宋以累年之括搜挾，百萬蓋藏，出其珍玩，綺穀歌舞，角觝享用，作樂之剩貲，可以結左右之歡，而及於寬政，倘一遂其奸，是皇上不惜太阿之重，而僅易此阿堵也。示之衆庶，昭之史冊，虧累令名，豈淺鮮哉？臣不勝激切待命之至。

吳文華會劾權璫申救言官疏

南京兵部等衙門尚書等官吳文華等謹奏為懇乞聖朝俯順輿情，特申國法，明賜乾斷，以全大體，以光盛治。事：臣等竊覩邸報該科道衙門交章論劾提督東廠辦事官校司禮監太監張鯨及錦衣衛提督辦事官校左都督劉守有等罪狀，皇上於御史何出光疏辭批下，法司將事內有名人犯提問。劉守有革任回籍，張鯨策勵供事。該法司問明奉旨：邢尚智監候處決。李登雲、張繼德烟瘴地面永遠充軍，獨於張鯨

止令痛加省改策勵供事而鯨弟都督張書紳所犯亦從免究以故中外洶洶不平法司抗辭執奏九卿大臣科道等官連章論劾而吏科給事中李沂辭尤愚戇不根致觸聖怒下鎮撫司用刑嚴究其批諭內閣九卿雖云張鯨已有處分而所謂處分者則但聽其引疾乞休准令私宅調理而已夫私宅調理者所以處中貴人老疾之辭而非待罪人之體也張鯨罪至無將法所難宥皇上不過念其供事日久侍奉微勞故不免屈法以示寬未必予假以需用而遠邇物情傳聞驚詫意張鯨必多方以求復進蓄毒以求一逞且謂劉守有重臣也已經斥逐邢尚智餘黨也已擬死戍而元惡大憝之張鯨乃寬假之優恤之不一而足臣等未測聖意所在第竊聞之書曰從諫弗咈去邪勿疑又先賢諸葛亮云宮中府中俱為一體黜陟臧否不宜異同今皇上之待言路若此其待近習又若此臣等不知於從諫去邪官府一體之誼何如

也且三尺法者高帝所定以貽皇上者也九卿大臣
皇上所與共理天下者也法司皇上所用以正紀綱
者也言路皇上所用以發奸伏者也今以一張鯨而
翫三尺之公法以一張鯨而屈盈庭之公論竊為皇
上惜之臣等職在蹕遯見在後時特以備員部院諠
切股肱上不忍累皇上之聖德中不忍釀宗社之隱
憂下不忍叢天下之指議為此急切上請伏乞大奮
乾綱將張鯨仍行盡法究問或謫發南京間住遺下
監厥職事急選老成清慎之人代之明示中外不復
收用其李沂見奉廷杖生死未分倘蒙小減俾以微
職効用邊徼則陛下雷霆之威更為解澤而日月之
明無不離照矣天下幸甚臣等幸甚緣係懇乞聖明
俯順輿情特申國法明賜乾斷以全大體以光盛治
事未敢擅便為此具本臣等不勝悚慄隕越之至謹
具奏聞伏
候勅旨

林汝翥劾魏忠賢疏

四川道監察御史臣林汝翥奏為憲臣詞嚴義正權
璫情真罪當懇乞細繹孤立之旨預杜孤立之禍早
靖肘腋以保治安事臣堂官楊連一疏直糾權璫魏
忠賢不法事二十四款款款逼真臣叨巡視北城之
役似亦無可言矣惟是皇上於楊漣疏則曰欲使朕
孤立於上夫孤立兩字臣正虞皇上之慮不及此耳
若慮及孤立誠祖宗在天之靈與四海蒼生之幸也
臣請申明孤立之說願皇上細繹之自古國家禍敗
至于不可救藥史冊所稱無不云人主孤立于上豈
其前後左右虛若無人哉惟是僉壬操權正人屏跡
即承命希旨之人百千萬億總名為孤立若漢唐之
往事可鑒矣漢之十常侍唐之王守澄仇士良等莫
不挾制乘輿濁亂朝政彼其初不過以待從舊人稍
加恩寵而干預朝政至于羽翼已成太阿倒授留之

則變生不測去之則禍且立至如是者謂之孤立耳
乃今日何如哉朝廷之所賴以贊襄上理者獨此二
三老成與骨鯁敢言諸臣耳孫慎行鄒元標王紀鍾
羽正等病者病去者去削籍者削籍滿朝薦文震孟
鄭鄮熊德陽等降者降黜者黜禁錮者禁錮鳳舉飄
飄鴻飛冥冥皇上將孤立于四海之上矣在野者無
論矣即在朝者三事几列非不師師滿座六垣十三
道非不濟濟充庭然章奏多出內旨票擬自更改隻
字片語稍闕內侍輒成氣相加大臣無所關其忠臺
諫無以盡其言則皇上將孤立于朝堂之上矣王安
有翊戴先帝之功擁衛皇上之勞矯詔謀殺身首異
處其餘無罪受害者不可勝數禁垣之間惟憚忠賢
之威福不知有皇上之威靈則皇上將孤立于內庭
之上矣甚且貴人得寵立刻就斃裕妃有喜勅令自
裁至于遶電流虹之祥倏為埋玉之慘客氏鼓煽動
之端忠賢竟誅鋤之威掖庭之內盡攝其毒則皇上

將孤立于宮闈之中矣此正在廷諸臣所由鰓鰓惶惶謂朝廷之上將有孤立之形不謂皇上更反言之以重為諸臣罪乎臣願皇上遠稽漢唐覆轍之鑒近杜他時孤立之釁立斥忠賢于外而東廠重地另擇其選將見君側之慝既靖海內之政日新自是官府一體內外傾心皇上遂得尊居九五之上永無孤立之虞矣臣無任悚惕待命之至

馬鳴起諫客氏六不便疏

臣聞人君一身天之宗子蓋天以君為元子則必當以天為大父母矣故所居之位曰天位所食之祿曰天祿宣於口者曰天言垂于世者曰天則有所賞賚曰天恩有所黜斥曰天罰必須頂天立地無私恩無私怨中正自持乃可以齊家治國稱有子焉若人臣之事其君也戴之如天戀之如父莫不欲其脩德凝

承之重對越祖宗之靈豈其激聒沽名良以分義莫
逃感恩圖報情自有不能已耳去歲皇考賓天時皇
上孤危移宮未定大小臣工莫不飲泣含鳴憂惶靡
措及登大寶莫不舉首加額共慶神民有主比見聖
孝繼述睿智夙成又莫不歡呼舞忭共喜奕葉重光
今二年于茲矣古者十五而入大學謂其成人伊始
亟宜脩身齊家以為治國平天下之本日見聖諭朕
前有諭着擇九月二十三日午時奉聖夫人客氏出
去朕思客氏朝夕勤侍朕躬未離左右自出宮去訖
午膳至晚通未進用暮夜至曉憶泣痛心不止安歇
勿寧頭眩恍惚已後還着時常進內奉侍寬慰朕懷
外廷不得煩激傳諭大小臣工知之特諭欽此臣捧
讀未畢驚惶無地凡可以調護聖躬寬慰聖懷者果
其無傷于義外廷諸臣當如何將順以貽君父之安
乃敢過為激聒乎細思大義有殊不然者客氏朝夕
勤侍不過曲謹微勞孰與皇考皇母生身之大保姆

外出憶泣痛心幾傷玉體之和試思天地付畀之身
皇祖考燕貽之重不知當如何珍攝至諭諸臣不得
煩激是皇上英明首出知此番舉動未協輿情煩激
所不免者蓋在廷諸臣保護愛戴之私豈盡後于婦
人即眷念乳哺之情在廷諸臣豈不諒皇上如天之
德但恩可酬也錫以一品之名號加其第宅蔭其一
子例酬不可謂不厚矣若謂在內無調護之人也則
中閨有主已叶坤維之貞兩宮順承共抱食調之好
左右朝夕不可謂無人矣乃客氏者既出而復入已
去而復留意不容割使經綸拂經喜慰非量非所以
令天下後世見也臣以不便者有六祖宗家法親王
既長出封就國皇太子冊立便居東宮家人父子之
間毫不假借今乃以一介保姆長居禁地謂家法何
不便者一庶民之家禮法自持者恒嚴閭域之戒時
肅內外之防紫禁深邃保姆何人乃輒輕為出入非
所以肅宮禁之防也不便者二貫魚承恩小星誦德

美宜家者方慕刑于之化且女德難脩婦愛不極怙寵邀恩之漸可無履霜意外之虞不便者三宮闈動定原非外廷所能窺測然弓影使生疑鐘鼓時聞于外近有權璫線索易通涓涓不已將成江河不便者四今之出入外廷以為不可而爭之皇上以為無傷而罪之書之史冊謂以一寵婦之故繼逐言官貽累聖德不便者五國體所關內旨切責閣臣不力主持則貽譏青史主持不能得之皇上使天下後世謂皇上視輔臣不及一保姆輕朝廷而羞當世不便者六此固微臣款款之愚實皇上所宜熟思者也再讀聖諭謂臣下逞臆沽名欺朕幼冲夫臣之敢欺為天下之大戮諸臣莫敢自給至幼冲二字似非皇上所宜言者蓋皇上天縱神資當此聖作物觀之時精心講學軫念邊疆發帑無留滯之色批荅有如流之美即問道訪洛曷以加焉況在宥以來視漢昭辨上官之詐又數年矣奚可以幼冲自諭而罪臣下之敢欺也

伏祈皇上以宮闈為重以統天立極為主斷絕小恩
勿徇于嚵呶需呪之言採納羣議勿任夫喜怒愛憎
之私將天地祖宗實式臨之豈
特大小臣工共沐高厚已哉

葉向高請止礦稅疏

奏為直陳天下安危第一大機懇乞聖明亟圖挽回
消弭以保治安事臣惟人臣之事君也當官有常職
苟事闕宗社不得避出位之誅納諫有婉辭苟情逼
號呼不得逃危言之罪今日宗社安危之機萬口同
聲欲號呼于君父之前者則礦稅是已臣見臨清告
變戕殺四十餘人中使馬堂幾乎不免竊意聖明于
此必有處分決不令奉使辱命之中官晏然無恙以
貽地方之憂又意聖心必因此悔悟罷革稅店與四
海享安靜之福乃日復一日未聞德音臣等淺陋莫
知其故竊念今歲春夏雨澤愆期近自京畿遠至闕

陝赤地焦原亘數千里兼之閩越苦潦川貴苦兵吳越荆揚騷然擾動今日域中無一樂土試思此等世界如匪羸之人食以梁肉猶恐顛仆尚可推肌擢髓以速其斃耶此等事理人人皆知而陛下獨若有未釋然者不過以帑藏空虛急于補塞未暇念及耳以臣等愚慮天下人情不甚相遠陛下貴為天子享四海九州之奉尚猶患貧彼虫虫編氓囊篋幾何肯甘剝削最可痛者有一種窮民營生無計惟于行賈糶集之區百貨灌輸之地肩挑背負趕腳推車日覓數錢以資衣食養父母妻子一旦生計斷絕束手無如千百為羣推心飲血而其人又皆雄健多力之夫不聞禮義之輩逞而從亂如決水東流滔滔莫禦其勢非用兵誅之決不能定陛下受天地付託為生靈父母乃驅逼窮民陷于死地毋論憂及宗社即于心能不惻然耶即云中官奉使累朝誠有故事然惟正統以後乃始見之非二祖之舊章也世皇英斷盡行召

回遂為中興第一美政陛下為人子孫當紹述芳規
發揚大美乃以一時權宜使祖宗有信任昭璫徵求
貨賄之名書之史冊傳之後世豈國家之光神靈之
所想望哉大小臣工日望陛下改圖甚于農夫望歲
累牘連章冀回天聽而陛下恬若罔聞甚且以沽名
擯斥夫沽名賣直臣子大罪聖明之朝豈容有此但
今所陳列者皆事關安危情同休戚豈可以此名目
槩疑羣臣而杜其口哉直道難行嚴威易折自吳宗
堯吳實秀逮繫以來縉紳索氣守土諸臣上章告難
亦或委蛇其說無敢直言時事如此真可寒心陛下
若翻然改悟不過發數行詔書與天下更始薄海內
外懽忻鼓舞共沐天恩眼前世界便是唐虞如仍前
不改羣奸日恣羣怨日深臣恐秦隋之禍不旋踵而
至語云為于未亂今已亂矣圖于未形今已形矣已
亂已形勢不得不旋轉而旋轉之力又如此其易陛
下何靳而不為之乎蓋臣史官也見史傳所載人主

意向有所沉溺于臣下之諫未嘗不怒及其敗亡思往日之事未嘗不悔至于悔則已無及矣伏願陛下鑒往察來俯垂採擇先召還馬堂盡革稅店然後責撫按以治亂民之罪處置得宜孰不俛首聽命天下自此有萬世之安矣臣干冒宸嚴不勝戰慄隕越之至

董應舉嚴海禁疏

閩在嘉靖之季受倭毒至慘矣大城破小城陷覆軍殺將膏萬姓于鋒刃者十年未厭倭之視民如薙草焉歲劫歲焚歲殺有司將吏狼顧脅息莫之誰何其後乃得戚將軍繼光從浙提兵轉戰與俞大猷犄角漸次收復搜山臨海竭智窮力出閩于血肉水火之中而存其遺孑蓋至穆廟之世而閩始完其禍之慘烈而難收如此推其禍始乃繇浙閩沿海奸民與倭為市而閩浙大姓沒其利陰為主持牽連以成俗當

時撫臣朱紉欲絕禍本嚴海禁大家不利連為蜚語中之而紉逮問矣紉逮而海禁益弛於是宋素卿王直陳東徐海會一本許恩之流爭挾倭為難自淮南至于廣海萬餘里無地不被其殘滅而閩禍加慘矣當時微繼光無論東南閩非國家有也臣聞劫數將至民生外心昔日東南之亂天地一大劫也去今未五十年民又生心相率與倭為市即臣郡福州亦有之福首郡也處八閩之脊而綰其會福州有事則八閩中斷而不相屬臣幼時聞諸父老嘉靖末倭四劫得志一夕談笑內薄城下不過千人城上人股栗江上兵船銜尾閉眼欲走當事者不得已括金帛啗之揚揚而去當時幸城內無通倭者耳設有一焉為之內應省城必危省城危而八閩之道不通無閩矣今之與倭為市者是禍閩之本也而省城通倭其禍將益烈于前臣聞諸鄉人向時福郡無敢通番者即有之陰從漳泉附船不敢使人知今乃從福興界中開

洋不五日直抵倭之支島如履平地不知是何惡少
開此徑路一人得利踵者相屬歲以夏出以秋盡歸
倭浮其值以售吾貨且留吾船倍售之其意不可測
也昔齊桓欲取衡山而貴買其械欲收軍實而貴糴
趙粟即未必然他日駕吾船以入吾地海之防汎
者民之漁者將何識別不為其所併乎萬一有如許
恩曾一本者乘之不賈白衣搖櫓之禍乎又况琉球
已為倭屬熟我內地不難反戈又有內外通倭者為
之勾引乎此非獨閩憂天下國家之憂也臣聞伏卵
翹飛茅蘖穿屋螫蝮破山乳蟻漏海事有未作亂有
未形况乎其已著者也使嘉靖之季早嚴海禁則王
直必不敢自徽往徐海陳東不敢自浙往曾一本許
恩不敢自閩自廣往東南受禍安得若是烈也由今
思之則朱紉曲突徙薪之策勝于十萬之師猶當追
錄而祀之奈何使蒙不白之冤于異世乎戚繼光收
復閩土庶幾什一于湯和况乎坐鎮薊門十五年一

塵不聳不知省國家幾千萬錢糧全邊塞幾千百萬
赤子乃生不蒙列土之封死不獲華衮之謚將何以
勸忠勇而鼓其死力也嗟夫時平則文吏持議使先
見之士不得終其謀世亂則武夫効死至治平而復
忘之國之大患故在於此昔弦高犒師秦兵却走契
丹狙宋萊公戒心智高蓄謀宗旦蒙死今臣鄉郡通
倭而臣獨言之則臣之家族必受其禍矣然臣不言
則全閩禍而國家亦禍語云先事而言是謂不祥後
事而言國受其殃臣不敢避不祥之禍使至于殃國
故敢冒昧上聞伏乞勅下臣部早選才望有方畧者
為福建海道專主海禁假以便宜凡惡少通倭有據
及大姓出母錢資之通者皆重法以折其萌比于武
王拘戮羣飲之義若海道能禁絕通倭卓有成績加
銜進秩與之久任或照邊方兵備一體超陞仍乞勅
下兵禮二部議勸朱紘當日因何受逮曾否嚴行海
禁果無他罪止因海禁為士夫所中乞為申白建祠

原鎮地方以風任事之臣詳勘威繼光救閩功次并
薊門十五年不罹兵患其功當比何人或并名將俞
大猷一體賜諡使忠勇者樂
忘其死亦今日之急務也

國朝施琅請留臺灣疏

題為恭陳臺灣棄留之利害仰祈
睿裁事竊照臺灣地方北連吳會南接越嶠延袤數千
里山川峻峭港口迴乃江浙閩粵四省之左護隔
離澎湖一大洋水道三更餘遙查明季設水澎標于
金門所出汛至澎湖而止水道亦有七更餘遙臺灣
一地原屬化外土番雜處未入版圖也然其時中國
之民潛至生聚于其間者已不下萬人鄭芝龍通竄
居此以為巢穴及崇禎元年鄭芝龍就撫將此地稅
與紅毛為互市之所紅毛遂聯絡土番招納內地人
民成一海外之國漸作邊患至順治十八年為海逆

鄭成功所攻破盤踞其地糾集亡命挾誘土番荼毒
海疆窺伺南北侵犯江浙傳及其孫克塽六十餘年
無時不仰屋

宸衷日奉

旨征討親歷其地備見野沃土膏物產利溥耕桑並耦
漁鹽滋生滿山皆屬茂樹遍處俱植脩竹硫磺水藤
糖蔗鹿皮以及一切日用之需無所不有向之所少
者布帛耳茲則木棉咸出經織不乏且舟帆四達綠
縷踵至飭禁雖嚴終難杜絕實肥饒之區險阻之域
逆孽乃一旦凜

天威懷
聖德納土歸

命此誠天以未闢之方興資
皇上東南之保障永絕邊海之禍患豈人力所能致夫
地方既入版圖土番人民均屬赤子善後之計尤宜
周詳此地若棄為荒陬復置度外則今臺灣人居稠

密戶口繁息農工商賈各遂其生一行徙棄安土重遷失業流離殊費經營實非長策況以有限之船渡無限之民非閭閻數年難以報竣使渡載不盡苟且塞責則該地之深山窮谷竄伏潛匿者實繁有徒和同土番從而嘯聚假以內地之逃軍閔民急則走險糾黨為崇造舟製器剽掠濱海此所謂藉寇兵而齎盜糧固昭然較著者甚至此地原為紅毛住處無時不在涎貪亦必乘隙以圖一為紅毛所有則彼性狡黠所到之處善為鼓惑人心重以夾板船隻精壯堅大從來乃海外所不敵未有土地可以托足尚無伎倆若以此既得數千里之膏腴復付依泊必倡合黨夥竊窺邊場逼近門庭此乃種禍後來沿邊諸省斷難晏然無虞至時復勤師遠征兩涉大洋波濤不測恐未易再建成效如僅守澎湖而棄臺灣則澎湖孤懸汪洋之中土地單薄界於臺灣遠隔金廈豈不受制於彼而能一朝居哉是守臺灣即所以固澎湖臺灣

澎湖一守兼之沿邊水師汛防嚴密各相犄角聲氣
關通應援易及可以寧息況昔日偽鄭所以得負抗
通誅者以臺灣為老巢以澎湖為門戶四通八達游
移肆虐任其所之我之舟師往來有阻今地方既為
我得在在官兵星羅碁布風期順利片帆可至雖有
奸萌不敢復發臣與部臣撫臣會議部臣撫臣未履
其地去留未敢進決臣閱歷周詳不敢遽議輕棄者
也伏思

皇上建極以來仁風遐揚威聲遠播四海賓貢萬國咸
寧日月所照霜露所隊凡有血氣莫不臣服以斯方
拓之土奚難設守以為東南數省之藩籬且海氛既
靖內地溢設之官兵盡可陸續汰減以之分防臺澎
兩處臺灣設總兵一員水師副將一員陸師叅將二
員兵八千名澎湖設水師副將一員兵二千名通共
計兵一萬名足以固守又無添兵增餉之費其防守
等官定以三年或二年轉陞內地無致久任永為成

例在我

皇上優爵重祿推心置腹大小將弁誰不勉勵竭忠然當此地方初闢該地正賦雜餉殊宜蠲豁現在一萬之兵食權行全給三年後開徵可以佐需抑且寓兵于農亦能濟用可以減省無庸盡資內地之轉輸也蓋籌天下之形勢必求萬全臺灣一地雖屬外島實關四省之要害勿謂彼中耕種尤能少資兵食固當議留即為不毛荒壤必藉內地輓運亦斷斷乎其不可棄惟去留之際利害攸係恐有知而不言如我朝兵力比于前代何等強盛當時封疆大臣無經國遠猷矢志圖賊狃于目前苟安為計畫遷五省邊地以備寇患致賊勢愈熾而民生顛沛往事不臧延禍及今致遺

朝廷宵旰之憂臣仰荷

洪恩天高地厚行年六十有餘哀老浮生頻虞報稱末由熟審該地形勢而不敢不言蓋臣今日知而不言

至於後來萬或滋蔓難圖竊恐

皇上責臣以緘默之罪臣又焉所自追故當此地方削
平定計去留莫敢擔承臣思素之必釀成大禍留之
誠永固邊圉會議之際臣雖諄諄極道難盡其詞在
部臣撫臣等耳目未經又不能盡悉其概是以臣於
會議具疏之外不避冒瀆以其利害自行詳細披陳
但事關

朝廷封疆重大棄留出自

乾斷外臺灣地圖一張附馬塘遞進

御覽緣係條議臺灣去留事宜貼黃難盡伏乞

皇上睿鑒全

覽施行

覺羅滿保題報生番歸化疏

題為

聖德軍敷十二番歸化仰請詳題以昭盛治事據福建

布政司布政使沙木哈按察司按察使董永艾會詳
該臣看得臺灣遠屬海外民番雜處習俗異宜自入
版圖以來所有鳳山縣之熟番力力等十社諸羅縣
之熟番蕭隴等三十四社數十餘年迎邀
聖澤俱各民安物阜俗易風移其餘南北二路生番自
古僻處山谷聲教未通近見內附熟番賦薄徭輕飽
食煖衣優游

聖世耕鑿自安各社生番亦莫不歡忻鼓舞願附編氓
今據臺灣鎮道詳報南路生番山猪毛等十社土番
匝目等共四百四十六戶男婦老幼計共一千三百
八十五名口北路生番岸裏等五社土官阿穆等共
四百二十二戶男婦老幼計共三千三百六十八名
口俱各傾心向化願同熟番一體內附等由冊報前
來臣因海外生番輸誠歸化若非撫綏安置備極周
詳無以仰副

皇上德澤恩溥遠至邇安之意隨會同撫臣批行鎮道

確勘議詳復行福建布按二司詳悉酌議去後茲據布政使沙木哈會同按察使董永艾詳報稱南北二路生番向與鳳諸二邑熟番接界今據慕義輸誠實由

聖德感孚所致查其地土毗連各有土官統攝醇樸馴良應循習俗令其照舊居處仍用本社土官管束無庸另設滋擾其汛守防範原有鳳屬南路一營之淡水汛諸屬北路營之半線汛相去匪遙飭令照舊防範用資彈壓并令文員加意撫恤除熟番聽其照常貿易外內地兵民毋許擅入番界生事及藉巡查擾累所報丁口附入版圖勿事編查順其不識不知之性使之共樂堯天其南北二路每年各願納鹿皮五十張各折銀一十二兩代輸貢賦聽其按年輸納載入額編就臺充餉此外並不得絲毫派擾以彰柔遠深仁等由造具各社番戶丁口數冊前來欽惟我皇上聖德神功光被四表文謨武烈協和萬邦聲教覃

敷已漸被于東西南北恩膏叠沛更周流於侯甸要
荒茲海外之番黎等寰中之蠕動乃猶仰沾
聖化願附生民具見草木昆蟲盡屬太和之保合雖在
黃農虞夏莫同廣運之規模臣幸際昌期欣逢盛事
即會同撫臣陳瓊捐備花紅銀牌袍帽猪酒飭令該
地方官將土官從優給賞外所當恭疏報

聞請

旨纂入輿圖昭垂典冊以誌無疆之盛業者也除將各
社番戶丁口數冊分送戶兵二部外所有生番歸化
情由臣謹會同撫臣陳瓊水師提督臣施世驄合詞
具
題

議

宋朱熹漳州經界議

具位臣朱熹準尚書省劄子備奉聖旨指揮令臣相
度漳州先行經界事聞奏者臣又據龍巖縣尉劉璧
申經界之行惟里之正長其役最為煩重疆里畝畝
分別土色均攤稅賦其在當時動經再歲彼出入阡
陌防廢家務固已不勝其勞一有廣狹失度肥磽失
宜輕重失當則詞訴並興而督責又隨至矣然有產
則有役適當重難使出身力以應役使亦無可奈何
然彼皆鄉民安知經界書算則必召募書人以代此
役而書人能書算必嘗為胥吏之傑黠者莫不乘時
要求高價執役之人急于期限不免隨索謝酌而又
簿書圖帳所用紙劄亦復不貲執役之人安能勝此
勞費竊謂經界之在今日不可不行行之亦不患無
成若里正里長書人紙劄之費亦有以處之則可舉
行若坐視其殫力耗財如曩日恐非仁政之意也臣
竊詳此意與臣所奏大指畧同而所
陳利害更為詳盡伏乞叅照施行

明林爌教土兵議

郡兵舊有定額自寇亂以來蓋日增不知其幾矣十
邑之民困于供億故吾鄉士大夫咸言不得已則願
罷浙兵予竊謂此未易輕議也何以言之夫論兵利
害者譬如養生無病者藥不可試病未瘳而勿藥亦
非善養生者矣嘉靖間倭寇吾土列城陷四郊焚蓋
環郡之外悉賊壘矣當是時也若非控于大邦假習
流之卒以驅封豕欲保其室家得乎今喪亂既平人
有功于我而棄之不可謂義矣且閩寇與浙直不同
倭之寇浙直也靡有內訌倏往倏來颶風一日棹數
千里稍不得利揚帆鳥舉矣吾閩海濱奸民樂禍稔
惡亂心無厭素為島夷耳目是故兵朝撤則賊夕至
矣不可不慮也故輕罷兵者是不審利害之實病未
瘳而勿藥之說也若夫欲全為久遠之計者則莫若
漸教土兵則可以漸省客兵郡多崇山峻嶺獨一面

距海兵法所謂挂地也伏而候之險而要之敵可以入不可以出雖韓白有不易窺者是故其禦賊也用奇而不用戰其養兵也貴精而不貴多自嘉靖末迄今十餘年有意土著久矣卒未臻其效者蓋亦有說浙兵之客吾土也居則有餉行則有齎踐更則有路資召募則有僱直而土兵數斗之糧猶不早給厚薄如此奈之何責之以死敵也假使以閩兵之養養客兵客兵必不為用以浙兵之養養土兵土兵獨不可用乎謂宜籍三衛丁餘以實缺伍可得千餘人萬夫長領之機兵弓兵汰以充餉者悉復舊額亦可得千餘人海防領之俱統于監軍專責之禦侮蠲其他役二三年後則土兵可強土兵既強然後浙兵之思歸者厚資遣之踐更而不願復者勿強物故有缺者勿補不惟閩之食者日寡而浙之耕者亦日衆此所謂一舉而兩利者也

李廷機三途並用議

天下之才譬若馬然有上中下乘馬上乘不鞭策而自千里也下乘雖鞭策之不前也若夫中乘則在鞭策之而已夫才亦何異于是今世談用人者越拘攣之見莫不曰三途並用然未覩並用之效者何也無乃于鞭策之道未之究也其當議者有五一日議詮以公其用二曰議舉以厲其氣三曰議考以服其心四曰議任以要其當五曰議撫按以司其權今銓人大都進士則畀以鉅者繁者中土者科貢則畀以小者簡者遐陬者愚以為夫豈無進士而不宜于鉅且繁者乎夫豈無科貢而宜于鉅且繁者乎矧遐陬之區多稱難治如之何輕畀之也胡不均而用焉進士而不宜者即處以小者簡者而不為故抑科貢而宜者即處于鉅者繁者而不為故伸至于遐陬難治尤慎選以往要以明天官用人自不可測視其才所堪

而無所膠于常調則除目一下而天下之才已爭奮矣故曰議銓以公其用也夫三途之格業已然矣使進士而無別于科科而無別于貢則天下誰復應進士舉者今欲混然不為之斟酌其勢難行即行之而不可以久愚請詔巡行使者所推轂以十為率進士十之五科十之三貢十之二今薦牘所列率右進士科寥寥而貢又甚矣自非進士往往以格自限而不思振拔誠令科貢得與進士分牘而列誰甘自棄者故曰議舉以厲其氣也今監司使者之考羣吏也進士稍稍能其官予上考矣即不能猶庇之科貢一不當置下考矣即能猶抑之如是而何以使人心服而強為良吏也毋亦令監司使者一秉公道惟視其政之何如而置其考不得操成心有所軒輊于其間夫然後居下考者亦曰上之人未嘗薄我而我自棄也各自咎而無所缺于上故曰議考以服其心也秦之法任人而所任不善者各以其罪罪之夫罪之以其

罪誠太苛然所任不善而任之者無罰則亦何畏而重其任也我國朝故有連坐舉主之條其後吏部虞於責備遂廢其行至倪文毅斷然行之叅究如制時論翕然夫使任而善者賞任而不善者罰有差則誰肯輕任人者夫惟不輕任人而三途之中賢者不患其不任矣故曰議任以要其當也究之則在乎撫按而已撫按公則其視天下之才皆公家之役也何分于三途撫按明則其別天下之才若衡鑑之懸也何患于眩亂夫一方之吏至數十百人而撫按二人耳擇一人以綜數十百人此之謂提綱挈領操銜要而收功博計莫便焉故曰議撫按以司其權也嗟夫古之取士舉二盜秦穆公用由余彼盜賊下人由余異類往往登之朝廷坐之國郡而不以為非矧三途士哉即如國朝黃福以貢士黃士奇以儒士胡儼以舉人繇斯以談士何常之有遇以庸衆人彼將庸衆自為也遇以國士彼將國士自為也故愚以為三途並

用之法誠行而酌于愚之所為五議者則亦庶乎足以網羅天下士矣

董應舉徭役議

國家之立法凡以為民也法之既立也必不能以不
敝而民情又率不樂久麗于法是故為國者宜酌其
時通其勢詢細民之病苦而善變之是明哲之遠圖
非拘攣者之所可與議也明乎此意而差役免役利
害可兩言決耳吾竊聞之古者之民官所養也故役
法皆民所樂趨輓世之民養官者也故役法非民之
所便易稱忘勞詩訓勿亟三五聖辟豈顧為沾沾以
傳民膾炙者迺血氣之類罔不殫輸財力以供一人
是遵何德哉此其尤大彰明較著者也世之降也貪
君暴主以天下為恣睢其勢既不能以不役民而取
之盡銖銖用之如泥沙竭山海之物力不足以供一
人之指使于是倍臣察相其飲之策生焉曰吾以天

下之財傭天下之力無事則公家之蓄有事則受事之直而于百姓則九牛之一毛也此免役之說也其說雖始于吳充而成于荆公然周官司會鳩民聖人已預行之矣夫巢居之穴敞則數仞之堂不得不構矣結繩之俗凋則汗青之文不得不炳矣席地之風移則五筵之几不得不設矣差役之法敞則免役之利不得不興矣況差役之法一復蒼生之稱貸財粟殫亡者固歡呼載道願出其力以致君上之供然力疲而不得息勞究而不得休駢首為溝中瘠者蓋不可以一二數而又安所用其財故上必有茅茨土階經始勿亟之主而後差役利也使阿房間左暴骨荆榛民有挺而走耳免役之利富者納直于官而役者受直于府雖至老死無復怨聲豈不甚善哉而免有定役勢必取盈上之裕壑未滿而下之膏血已罄矣嗟乎國家之制治也有治人無治法夫無不敞之法而有不敞之治者人為之也時與勢為之也天下殫

于財不得不思差役天下殫于力不得不思免役時不可以不乘也吳蜀之民以免役為便而病于差秦晉之民以差役為便而病于催勢不可以不審也使上焉者有用一緩二之思有繭絲保障之慮而為郡縣之吏者勿十在官而九在橐勿黃紙赦而白紙催則免可也差亦可也不然吾末如之何也已矣

沈一貫閩廣善後事宜議

伏見閩廣海寇近就殲滅獲醜獻功飲至嘉賚令海隅遐壤之鄉識天威之遠及明紀法之必誅無有逋漏甚感舉也然大兵之後有司困于招募民力應于征求居者有轉輸之苦役者有瘡痍之病譬之饑者未哺病者方起當此之時不思有以處之以善其後竊恐民不安所變將復至古人云平吳之後方煩聖慮此若為今日言者故臣敢述可行事宜以獻臣聞漳泉惠潮之間負山阻海擅魚鹽沃饒之利其民喜

關乍聚乍散有司急之不匿于谿崖篁竹之中則泛舟入海因風之所止泊而時出抄掠為患諸郡此非獨習性然也亦為吏者安集不稱之效也夫人莫不好生而惡死顧親戚而重離亡然而犯之不顧者以此之無以生之而彼之可以倖免也又仕于土者大抵多遷謫羈旅之人以此之人事乎其上彼亦惟貨賄是望孰肯為百姓為久遠之計者二者相合釀成厲階上下憂虞以有今日然臣之愚竊謂兵不可玩威不可褻方今海寇蕩平則彼依山負險者雖懷梟獍之心必且喪氣乘此時而撫之使之消兵及治農器不然則出兵剿之彼必惕吾之威而懷吾之惠其功賢于百萬之師遠矣此韓信收燕之策也其便一也既撫之後邊溫良長者治之退刻薄之吏開生息之途節賦斂之用堅樂生之願使民重親戚而畏死亡其便二也又事至則懼事平則玩人之情也今能勅閩廣諸臣所在提戍之處語戍兵時簡練以備不虞

雖境安烽息考足資滿不得數易特增其祿秩以褒之使民安其土官習其俗其便三也古者鄉有長閭有師黨有正故什伍相維民用輯睦今倣此法立之保伍糾其習業稽其戶口則雖欲為亂而不能矣其便四也君子欲立功名以自效于上甚于上之求下顧為之未見其成撓以衆議惑以浮言則誰肯以身博死者昔龔遂治渤海亦曰願陛下少寬文法今欲閩廣久安而無事莫若聽將吏以便宜治之不效然後治其罪毋從中而阻其便五也齊桓不肯曹沫之盟晉文不趨伐原之利非獨示信亦以勸來也今閩廣寇殺其黨以降非獨冀生亦以一人嘗我也如使懸賞格以來之又羅織其罪而殺之則佗負固者曰朝廷之不可信如此此所謂禁之使歸而教之使叛是後無降者矣元至正中張瑄朱穆寇海上後降而官之因賴其用安知今日無此等輩乎其便六也夫後之視今猶今之視昔也惟因循以養禍故至此今

幸決其癰矣不大養之何以善其後哉傳曰聖人防于未然書曰惟事事乃其有備有備無患則閩廣甯所以望陛下之撫綏者其機正在于此竊見陛下賞予將士既憊官而任子矣恐有逸成之患荒善後之策也故迷斯議焉

董應舉官糴議

穀米踊貴半由穀乏半由禁米米禁則富者閉糴以微利奸商乘急而躍價棍惡乘禁騙錢而米益貴此從來積害如今年五月末敵鄉爛米五升價至五分小兒貸錢一百七十兩買米至鄉而價始減非一百七十兩之米足周海濱有此米而閉糴者踊價者恐源源來而價不得不減其後某歸載崇安米僅四百十石以與人遠近相傳莫測多少而價遂大減蓋救荒無別法有虛聲有實備買穀他省實備也備至而

莫測多少奸富恐奪其利爭出所餘奸商恐持久不
售爭取微息而賣是以虛聲而速之平價也昔文潞
公治郡米價大起或勸其定價公笑曰是反為奸民
爭氣勢耳于是搜得倉米若干出四隅官賣之即日
而價平者民莫測官米之多少也今但歲發千餘金
市廣市溫台乘秋而往勒限而歸毋使過冬市廣用
廣人市浙用浙人必差品官發穀必于大暑前四十
日發必盡此無庸禁米而米常平官米亦且歲進矣
乘秋而往穀賤而人不勒也毋使過冬者久則費多
將蝕吾穀多也市廣用廣人市浙用浙人土人知穀
價所市必廉雖稍染而吾穀猶平也小官奉差難責
其一毫不取差品官者前程大不敢以官試法也發
必于大暑前四十日者此正常年踊價之候稍減時
價民利而官亦利也至若給發之法以秤不以斛斛
之大小難定而秤有據也廣穀甚賤官糴宜有利而
猶未益于官者持久而耗多也發不以時而價減也

又發不盡者復納之倉費耗益多也買之非其人發之非其時則官本少而民亦不甚見德如此而以官糴無益廢而不行恐後有急卒難救也蓋閩田少偷取山海之隙地以耕即豐年猶仰給他省況乎重荒故官糴之法于閩最便其次莫若限田縉紳家田勿過千畝寄庄者不許私立官戶以規其私闢田少而限田為尤宜然不能行也不可問也病廢之人急于民艱而言不自知其言之妄也

王家彥閩省海防議

職觀地勢自江南以北沃野千里不溝不洫因嘆職鄉海墾地如巾悅民耕無所且砂礫相薄耕亦弗收如以年荒賦急窮民緣是走海如驚橫海鵬張如周三李魁奇鍾斌等具最者也幸諸賊相繼殄滅為年來俄頃之小康不謂近日劇賊劉香老結連五師以掠同安鎮幾擾省會計自漳之福洋至省不知為幾

寨幾遊而中左居漳泉兩府之司為會省南來之門
戶誰司其地聽其揚帆直趨一至于此職請以歷來
祖制約畧陳之國初有衛所軍無別兵有指揮千百
戶無別將諸戍陸皆軍即烽火小埕南日浯與銅山
五水寨之舟師無非軍也而統于各衛之指揮謂之
衛總至嘉靖四十二年撫臣談論總兵戚繼光題復
舊制每寨設福哨鳥漿等號船四十餘隻于五寨中
分三哨屯大洋賊船必經之處其餘各寨附近緊要
港灣則分哨以防內限又于道里適均海洋定為兩
寨會哨之法北抵浙之金盤南抵廣之拓林聯絡呼
應戈船相望萬歷二十四年撫臣金學曾委分守穆
日鼎都司鄧鍾閱信地復請添設嶺山海墘湄州浯
銅元鍾礮山台山澎湖諸遊于一寨之中以一遊翼
之錯綜迭出雖支洋窮灣無不按焉自昇平日久而
額軍船頓失舊制指揮千百戶等官足不踰城市會
哨之法遂杳然矣至因之選民兵募客兵編鄉兵又

聯漁兵業軍而五矣夫昔之為軍者一而何以殺賊
今之為兵者五而藉愈虛賊愈熾此所以長太息也
按舊額而復之依分哨法而核之藉民兵客兵而簡
練之鼓鄉兵而官兵勿驚擾之復使沿海之四十二
灣漁兵之乖覺厚其餉傾賊所在照各邊夜不收例
以為海上耳目而頓制之皆今日不俟再計而決者
也至巡司之與衛所並建當日江夏侯周德興念眾
海踈節闊目乃于中所隙處設四十五寨城射手百
名以資邏警弘治四年按臣陸備始裁三分之一而
寨兵益寥寥矣夫以四十五司四千五百之射手碁
布于寨與遊之間懸軍挿羽聲勢自猛今寨既鞠為
茂草巡司官無專職延俟年月二三弓兵勾攝他事
以為生涯餽廩之意已無存矣為今之計莫若以本
寨原餉仍募土兵以充射手之數專令教師肄習弓
兵之外不許妄行勾攝恐為侵漁卒然遇倣賊少則
率此以應賊多則糾合各寨將所轄一方之水陸等

兵共堵擊焉撫按巡臨數買穀此外設法預蓄硝黃器械以備亟需仍令查盤清核撫按報命永著為殿最者也戚繼光之平倭也鷄鳴蓐食殲厥無遺故至今倭尤惕息其餘威以犯華不利為戒今賊且生生不已矣猶可留撫之一字以為海上之傳燈乎自賊飽而陽以撫愚我將飽而陽以撫酬賊于是旗鼓雖設壁壘雖嚴而賊之去來動靜未有不先通于將者兵乘賊至則引下風以避之賊去則尾其後以送之抽矢扣輪以發虛聲遮襲旁艇以當捕擊海波尚復有晏時乎惟曉然示以渠魁法在必殲以斷行間之觀望則將無所利于賊金粟馬羊之糧去而後陷陣死綏之志堅矣

國朝劉佑戰船事宜議

竊惟泉郡七邑地當濱海焚劫之餘民生凋敝十室九空所宜撫養休息庶幾漸有起色迺鄭逆遠竄臺

灣尚未歸化而遷移失業之窮民又往往聚夥近島而為盜此藩院所以會疏題請復設水師修理戰艦選將練兵出海搜捕以為邊防萬全之至計也然而法立弊生派辦繁苦是以衛民者害民有失藩院為地方綢繆之初心矣某叻吏茲土目擊時艱不得不為民請命痛切為憲臺陳之查各港戰船原有大修小修之例分定年限當不至于遂壞乃八年秋季方修之後至今未及兩年而春秋出汛輒復隨時興修且船隻無多應用物料當亦有限而此番估計採買之物以南安一邑計之為值四千六百餘金除布司所發工價四百三十餘兩之外一皆出之民間限期迫促比追嚴峻而一二奸商乃得乘人之急交通承役將弁勒索重價通計七邑所費不下二萬餘金其實用之于戰船者雖不知其幾何而以理度之當不止于一科十廳縣坐受催迫道府莫得查核是修船止為商弁之利矣里民困于追比不惜鬻賣男女

以苟目前之安然而財盡民窮後將不繼使其逃亡轉徙則罪將誰歸竊以採買物料與其責之于令吏不如責之於將弁估計工力與其委之于將弁不如委之于道府且大修小修既各定有成限亦何埃取辦于臨時理合請祈憲臺俯察民艱恩賜酌詳嗣後凡遇應修之年預先估定應用物料價值詳請布政司照數發給該水師營自行修理交付駕船軍士日夜照管澆蓋毋俾風日侵損其有不及年限而壞者定係該船軍士偷安怠惰該營將即當以法繩之如此則兵無缺用之船民無苛派之擾其有益於地方非淺鮮矣某查兵米一項舊皆各縣買解弁丁苛索民不堪命致有百萬軍餉之案至康熙七年始議給以餉銀行之三年兵民相安則修船一事利病較然矣又聞粵東船隻悉係發給營將修理閩省亦何獨不可行哉某為地方生民起見故不禁言之痛切如此伏惟電鑒而裁詳焉

蕭震道山議

閩會城風水久破壞官民多不利今春督撫臺議建鼓樓為全城屏障所以為吾閩人功德甚盛但以時詘舉羸不得不少有待然閩風水非一具當漸次補救者道山其一也道山在城之西于山在城之東屹然對峙為左右頂舊各設浮圖以鎮之又於于山建玉皇閣道山建斗姥宮當閩之盛山林相望鐘鼓時聞更有芝山寺鼓樓靈源閣龍腰西湖城河城屋為之倚伏以壓制諸煞資城中生旺之氣居人賴之其後龍腰鑿城屋折河淤塞芝山寺鼓樓靈源閣連遭祝融之變全城風景日益蕭索無復向時所稱安土樂生者今于山之玉皇閣已經重建而道山勝槩關爾無聞且郡治各培塿接脈九峯山由西北穿城入屏山而道山見見而伏伏而于山再見是閩城之有二山猶人之有左右二臂也道山之斗姥宮向以假

并張國威妄拓舊址鑿山腰建他墳屋為郡人告逐
寺隨廢夫山不可鑿也鑿山以建屋屋建而鑿者尚
隱及屋折而鑿者益見更大不利鄰甯之上故有亭
可望新羅諸島今基址久廢復有遊僧築牆屋其中
又營兵胥隸之屬常常入山汙穢伐松柏或索飯食
少不應輒嗔目詬厲予聞之不勝感嘆凡有事閩土
者詢道山亦滋惻然也予既慨于中無得長者言適
戴宸綸封翁肯毅然任出入凡諸工程視物力為盈
縮毋銖銖錙冒破以告仁人君子冀閩人之得安全也
其有同心耶至于芝山寺鼓樓之當重建西湖之當
清濬城河之當疏通龍腰之當修補靈源閣之當焚
埽城屋之當相度視其難易緩急為之次第經營是
惟長民者念我殘疆造我室家頌功
德且將世世矣故因道山而並及之

策

明陳實百問策

卷六十九

聖人之育材與王者之報功事雖殊而道則一也請
試陳之昔孔子當春秋之否轍環不遇乃欲以轉否
之責博望諸徒故杏壇設科時則有七十二賢焉漢
明帝承光武之統國家閒暇乃欲以救功之典激厲
羣雄故雲臺紀績時則有二十八將焉收桃李于宮
牆列姓名于廊廟天下後世稱師道君道之極者有
以夫今自夫七十二賢之德言之顏閔冉耕雍子子
貢與夫冉有季路言偃商師其德之載諸孔論者無
待陳矣自此之外去捷徑而私謁是戒持捐介而百
結是甘有減明原憲矣然遇事而不更其守貧賤而
不移其心不有商瞿顏襄曹邴顏高者乎親賢以造
君子願學而為小相有子賤子華矣然脫庸俗以遊
高明習禮樂以養性情不有梁鱣漆雕哆商澤冉孺
伯虔者乎南宮适之所尚在德漆雕開之見道分明

固不可及其他公孫龍后虔或學君子或務自修壤
駟亦樂欵孔忠或道中庸或明家學其有得于聖教
何如哉公治長之非罪冉子季之四長固為可稱其
他漆雕徒父鄔單榮旂或以操著或以才名公哲哀
良孺原亢籍步叔乘或敬治已或惠及人其為聖門
之傑出何如哉究孝弟以體悉聖心遭患難而寵辱
一致石作蜀有若巫馬期句井疆縣成其人也志不
降而行不淪俗累細節而守不詭隨申振罕父黑琴
牢左人郢其人也更寒暑而學不厭隨窮達而守如
常孰若公夏首狄黑秦商顏之僕燕伋秦非焉仁孝
備而貌如愚粗鄙變而志仁道孰若高柴公堅定鄭
國災須焉避叛兄而能潔遵善誘而德馨司馬耕與
顏子柳耳至于句茲容箴公西箴施之常其所以聯
同姓而明臣道謂非斯人之徒與道可明而志不屈
聞詩禮而喜得三公西與與陳子禽耳至于顏噲廉
潔任不齊叔仲會邾巽其所以履中正而挺高尚謂

非斯人之匹與吁此聖教之所甄陶而為天下萬世之所崇祀者也復自夫二十八將之功言之滅羣雄除苛政當夫斬將寧旗攻城畧地者固不乏人而其功之尤為特異者果為誰哉首建大策以光復為必可為鄧禹壯矣然鎮守河內使民生不苦于兵戈不有寇恂乎八戰八克以敵國為不足謀吳漢勇矣然安集關中致百姓相安于無事不有馮異乎折衝千里彎弓三百自古惟勇將能之而賈復蓋延匹美矣憂國奉公善待士卒自古惟仁將能之而祭遵王霸克追馮耿俞決策定計而以勝算高天下固兵家之雄也而耿純陳俊料敵如神每出而成克捷之勲非中興良佐乎任光羽翼太平而以威望先士卒固當世之英也而郗彤萬修運奇掌上逐鹿而樹萬全之功非佐命巨擘乎王梁杜茂應亦符而擊五校矣乃撫劍抵掌志馳伊吾之北者臧宮馬武也岑彭姚期平西蜀而斬王郎矣乃善治障塞身負矢石之難者

馬成堅鐔也景丹傅俊李忠或修戰勝之烈或叅帷
幄之謀為功不同而其策立于當時者要皆從王事
以有終者也朱祐劉隆劉植或稱汗馬之勞或展運
籌之功所建不同而其効力于王國者要皆為社稷
之翼衛者也然論者謂七十二賢中有秦冉顏何申
黨夫三人者將以為是則德業聞望寂然無聞何與
意者世殊時異傳記有所差訛故若存若亡如此耳
又謂二十八將外有王常李通竇融卓茂夫四人者
將以為非則并畫于臺一體崇祀何與意者功非草
創績在方來故推恩至此耳要之賢人君子何代無
之而名世之出每待王者觀聖廟者甚母以七十二
賢為絕德當如宋邵揚程朱諸公庶無負聖教而得
與夫從祀之列觀雲臺者甚母以二十八將為奇功
當如國朝徐常沐郭諸公庶感動帝衷而得與乎畫
圖之選
者哉

周之變海寇策

善醫者必察其受病之源而後病可除也善兵者必察其致亂之因而後亂可靖也自古治外盜與治內盜不同治饑寒之盜與治桀驚之盜不同治方張之盜與治盤結之盜又不同外盜驅除之而已內盜則處肘腋腹心常有潰決重傷之禍饑寒之盜撫循安集之而已桀驚之盜天資喜亂犯上恣睢于法無赦方張之盜一舉撲滅之而已盤結之盜叛服不常黨與日盛使吾民離遏轉徙而彼安受其燼終可以逞閭今日寇患深矣其始非有饑寒失業迫使流亡也生長海濱襁席波濤一二桀驚智力自雄既不能耕耘作苦粗衣惡食長貧賤而老子孫而洋船違禁以暹羅占城琉球大西洋咬啣吧為名以日本為實者絲寶盈行而出金錢捆載而歸艷目薰心啓戎誨盜視洋船如原獸分肉垂涎即殺掠為生涯講求日篤

於是乎寇遂不可問矣始而通倭者有主萃既而掠通倭者又有主萃則奸富遍國中也始而掠番船以圖厚實者無已時既而掠商船掠漁船掠兵船以壯聲勢者亦無已時則鯨鯢遍海上也闌入焉武夫力而拘諸水貴人膺而釋諸庭矣要挾焉衣冠未赭更突弁以疏榮桑椹厭殮復掣鐵而颺去矣一寇未平一寇復起殺人之父而使其子弗敢仇殺人之兄而使其弟不敢報嗚呼是尚有法乎無已則明問標本之說對症之藥其憂深其慮遠敢以臆而暢其旨所謂治標者有四一曰禁接濟以絕賊資夫堅壁清野兵家所先賊踪跡在水其精神未嘗頃刻不在陸而其窠穴又未嘗頃刻敢離水也彼多掠金錢所不足者粟米耳奸民貪數倍之利陰售之具一二為乞糴救荒者途經賊強力無捍禦適足資盜糧耳誠禁接濟則賊無所得食必登陸苟登陸則失其所恃失其所恃則人能制其死命此司馬仲達之所以困公孫淵也二曰練鄉兵以衛村堡賊既登陸掠


食矣非敢盡登也必以其半守船以其半登陸焉夫海船莫能近岸拋泊潮至以小船往來潮退即行于泥中耳沿岸之民方具未登俯而擊之便及其既登隘而同之便但苦無兵器火藥也誠立殷戶為雄長授之火械俾募豪勇而官又為之明斥堠伏奇兵以相策應一付團練村村皆然此李崇之所以平寇盜也三曰謹間諜以携賊黨夫賊非異人即吾民耳掠商漁而乘其船脅其入故黨曰蕃焉計一船之真盜巨盜無幾餘皆被擄耳吾無以制賊毋論既擄者畏賊即未擄者慕賊誠聞脅從之生路重懸購賊之賞格鄉兵既控之于陸水兵又要之于水被擄知賊之虛實必內應而相圖求脫此高仁厚之所以破賊能也四曰擇水將以教攻戰夫水戰長技只在衝掣放火奪上風燒蓬棚射舵工既破敵矣然數若賊與我共之恒以被擄前驅使吾之火藥器械幾盡乃出精銳乘吾倦吾舵工繚手畏賊而不敢直逼賊船偵帥執袴乳臭

暈嘔忙亂又何暇指揮哉誠擇將于老漁簡兵于海戶以漁船駕銃突入賊圍募水工入水鑿沉賊艘或誘之入港而絕其歸路或與之夜戰而乖其所之此岳武穆之所以破楊么也接濟禁則以飽待饑鄉兵練則人自為戰間諜謹則以賊攻賊水將擇則輔周國強兼此四者而有合于太公日中必彗操刀必割執斧必伐之旨而後賊可殲也所謂治本者亦有四一曰申法令以一人之心夫人之所以饑寒困苦而不敢為非者畏法耳使為盜者必生不為盜者必死則民化為盜使為盜者必死不為盜者必生則盜化為民洋船之為日本非日本也無辨而貨物則有辨盜賊之會剽掠未剽掠也難跡而奇富則易跡嚴保甲焉嚴津梁焉窮賊而必窮其輿援之淵藪獲賊而即賞以所獲之贓物投鉅不厭刻鳴桴不憚勤此子太叔所以戮萑苻也二曰扼要害以壯形勢舊制烽火寨北界浙江南界西洋小埕寨北界西洋南界南茭

南日寨北界南茭南界平海浯嶼寨北界平海南界
擔嶼銅山寨北界擔嶼南界柘林五寨在海中如處
弓弦之上每寨兵船分二艘屯劄外洋會哨交界聲
勢聯絡互相應援自移寨內港而形勢縮判寨為遊
而兵力分寇所以侮而動也誠復外洋之信地考會
哨之故規不惟使內寇灰心且使外夷破膽此太公
望之所以廓四履也三曰汰破冒以省兵餉夫每寨
兵船四十隻約用水兵二千二百名五寨通計用船
二百隻用兵一萬一千比國初已減無容再減矣今
船則敝漏稀少問之輒曰缺餉而無從改造兵則包
攬虛無問之輒曰缺餉而莫能勾補以敝船載弱兵
遇賊不敵也甚者舟在水而兵居岸有急反自焚其
舟以先遁夫額設兵船原有額設之餉隔汛小修五
汛中修九汛大修十汛改造原有修造之費今皆安
在而待別區畫乎誠核舊額而養新標乘改造而易
南鳥新標習風濤勇足鼓也南鳥便追逐製易就也

則有增兵增船之實而省其費此路博德所以靖東
甌也四曰清海道以通商販夫閩三面距海山多田
少雖豐歲尚資鄰粟故漳泉販之惠潮興寧販之溫
台省會販之上四郡上四郡不足則又販之江廣此
定界也海寇多外販塞遂交責其仰給于人者而給
人閉之則有遏糴之譏開之則有從井之誚彼寨遊
會哨正為驅盜護商設耳誠召商給牒以兵衛之販
粟故道則興漳泉不仰省會而接濟無從闌入不亦
彼此俱利乎至于海壇地廣可耕內徙之後隔為孤
島東蕃淡水乃夷漢出入樵汲之地多粟少貨今紅
夷據之民私互市勢不可絕曷若大開海壇耕墾之
路明立東蕃市販之格收其稅資其粟內充軍實外
糜屬夷此劉晏所以通四方羊祜所以繫鄰敵也法
令明則民與上同意要害扼則致人而不致于人破
冒汰則役不再籍糧不三載海道清則無遠輸貴買
無此四者而有合于尉繚農戰不外索權救守不外

索助事養不外索資之旨而後賊可銷也夫除盜之法非撫卹即剿彼龔遂張網虞詡之槩從寬政戴淵周處李祐之卒為忠良亦古今不再之局耳即思田之役盧燕王受襄甲受杖議者猶謂文成之襲幸其斷藤效命不減雪夜懸瓠耳即閩已事鄧茂七王直徐海林道乾輩何嘗不膏斧鉞哉今天子聲靈赫濯執事文武壯猷而蠱茲奸民無端為上東門之囁介冑言戰生雖愚不能覩覩似似為賊下矣



福建通志卷六十九